

東
華
續
錄

東華續錄

咸豐九十八

臣王先謙敬編

臣陶濬宣恭校

咸豐十一年辛酉春正月庚寅朔 上詣 綏成殿行禮 御澹

泊誠敬殿受賀 御勤政殿賜近支親藩宴○辛卯諭內閣朕於

二月十三日回鑾○壬辰諭內閣朕於三月初二日啟蹕恭謁

東陵禮成後駐蹕避暑山莊所有應行事宜著各該衙門敬謹豫

備○諭軍機大臣等薛煥奏英國領事爭辨賠款並阻撓稅捐各

等語業經諭知薛煥向該領事曉諭妥辦矣賠補一項據英國領

事密迪樂稱普魯斯來文係於上海關總收數內各扣賠項二成

除洋商按貨完稅外尚有外國商船所完船鈔及海關所收罰充

入官等款亦應一併覈扣又上海新定洋藥納稅章程密迪樂稱

洋商已完上海進口稅斷不能重收華商稅捐其和販洋藥寓居
洋涇濱之駱增美一犯該公使並不准查拏於稅捐殊多掣肘見
在各國通商章程甫定彼此均應循照定章方能允協恭親王原
咨但指納稅清單並無船鈔罰款字樣該領事欲照總數覈扣著
恭親王奕訢等卽照會普魯斯告以旣於關稅內交還二成卽不
應加扣船鈔罰款兩項况船鈔係充浮椿號船塔表望樓等項經
費罰款係隨案充賞並不收庫均無從追回覈扣並令其通飭各
口領事官一體遵照至洋商進口華商出口所納洋藥之稅兩不
相礙該領事總以徵收華商之稅礙及洋商貿易諭辭煥安爲辦
理並著奕訢等隨時畱心儻普魯斯轉據密迪樂之言有所陳瀆
卽據理辯論並將私販之犯令其交出以杜欺蒙原片著鈔給閱
看○予江西被戕州同喻時和祭葬世職○癸巳 上御萬樹園

大幄次賜蒙古王貝勒貝子公台吉等宴○諭內閣朕於二月二十五日臨御經筵所有應行典禮著各該衙門敬謹豫備○甲午諭軍機大臣等本日據景瀄等奏密陳俄國分界各情並繪圖貼說呈覽新定俄國條約內載明遇有中國人往之處及漁獵之地俄國均不得侵占著奕訢等卽酌擬照會二件一照會俄國總理各國事務大臣告以見派大臣查勘地界俄國之人應俟勘明地界之後方可居住不得先行占踞致該處屯戶驚疑一作爲成琦之意照會東海濱省固畢爾那托爾亦屬其俟該侍郎與景瀄勘明琿春地界方可俄人居住總須遵照條約方爲妥善原摺著鈔給閱看○乙未諭內閣總理各國事務衙門挑取滿漢章京前經降旨毋庸再兼軍機處行走嗣據恭親王奕訢等奏請在額外行走專管交涉事件復諭令再行妥議茲據酌定章程具奏著照所

請所有滿漢軍機章京每班挑取各四員在總理衙門額外行走
仍照常任軍機處值班毋庸常川到署○曾國藩奏自金壇甯國
疊陷後南陵一邑孤懸城中總兵陳大富力守危城糧盡援絕勢
難久全臣鑒於金壇被害之慘恐南陵軍民又遭屠戮於上年疊
次密飭陳大富由間道衝出並咨商提臣楊載福派師船至江濱
接應九月積雨江漲小港皆可行舟楊載福定計潛師往援親督
礮船進次樅陽探聞南陵城外賊壘密布惟北門一港可達魯港
水程約計百里而近城一帶賊復夾港築壘僅餘一綫之路當就
樅陽調出千總尹昌景等各領陸兵與礮船相輔而行十月初二
日師至魯港派總兵李成謀等扼紮港口使蕪湖之賊不得截我
出路初三日進港見沿途水面狹隘恐賊乘我之後復派參將楊
占鼐等領兵步步爲營初四日水陸並進港左守壘之賊遂擁出

撲副將丁泗濱等率師奮擊斃賊多名焚燬各壘尹昌景等領隊直攻港右衝入賊陣逆眾敗潰其另股賊匪乘勢橫鈔副將李朝斌領師船開礮擊賊稍退卻尹昌景等併力衝殺賊盡披靡遂將港右十數壘全行焚燬陳大富知北路援師已至乘勝將東南西三門賊壘一律埽平追殺十餘里斃賊無數立解南陵城圍陳大富猶思趕緊繕完力圖守禦楊載福以水師旣難畱駐該逆必將復至孤軍久守終成坐困因勸陳大富拔出全軍同赴上游初五日督隊徐行百姓從者十餘萬眾僞忠王李秀城率賊黨數千賊划百餘在小河及石碇地方意圖截我歸路經楊占鼐等竭力堵禦楊載福復添派親兵助剿將賊擊退水陸軍民始得出港二十五日抵黃石磯十二月初三日安插軍民於東流縣城安籌周恤查楊載福此次出奇制勝保全甚眾足以作士氣而固人心可

否籲懇 天恩賞資物件以示旌異出力將弁可否由該提臣擇
尤保奏均出自 聖主鴻慈 上諭安徽南陵縣城久被賊眾圍
困總兵陳大富竭力守禦待援孔亟經提督楊載福統帶水陸各
軍由北門外之魯港進兵將賊壘全行焚燬陳大富乘勢將東南
西三門賊壘一律埽平拔出南陵全軍保護百姓十餘萬人妥爲
安輯楊載福出奇制勝調度有方深堪嘉尙著發去大荷包一對
小荷包四箇白玉搬指一箇白玉翎管一枝小刀一把交該提督
祇領其餘出力將弁並著該提督擇尤保奏候朕施恩○曾國藩
奏江西自上年賊犯建德普承堯一軍潰退賊卽長驅深入連陷
六縣而官軍與賊必爭之地莫如湖口與景德鎮景德有左宗棠
一軍駐紮湖口則並無陸兵僅有都司丁義方水師駐防臣於建
德失守後卽派道員吳坤修帶團防營千餘人馳赴湖口防守道

員彭玉麟復派副將成發翔馳往會同守禦並親由黃石磯赴援十一月初九日寶營潰勇逃至湖口成發翔等擇畱精壯五百人分布城頭駐守吳坤修團防營亦於是日趕到沿途爲賊所截把總李逢貴六品軍功吳脩霖力戰陣亡營官景星熊烜煌督率所部入城當令寶營團防營陸師駐守東南兩門以防山城成發翔丁義方自率水師駐守西北兩門以防水城十二日賊自彭澤率大股上竄湖口屯踞離城十五里之馬影橋十三日賊眾萬餘分四股直撲各門我軍併力擊退旋復昇長梯而至其東西南三股先進對城開槍子密如雨繼以木梯蠶擁爬城城上礮石齊下迄不稍退丁義方見賊勢兇悍率哨官張三元等帶水勇登陴助戰熊烜煌等往來擊殺自申至酉齊力抵禦而城南適有缺口趕修未成悍賊數名冒死登城經千總江必勝砍倒並以大桶火藥擲

韓城下斃賊無數賊始退去我軍開城追殺百餘人奪獲木梯三百餘架賊仍退踞三里街馬影橋等處十四日諜知賊於村莊搜覓樓梯欲乘風雨夜半爬城彭玉麟飭令談開亮選帶十餘人潛出偵伺遇賊負梯送三里街奪獲多件是夜風雨益甚咫尺莫辨彭玉麟在城垣督飭各營分投梭巡見四山僻徑隱隱火光自遠而近各營哨冒雨立垛口靜以待動守至天明派勇縋城哨探則三里街及馬影橋已無賊蹤詢之民人言該匪環伺無隙可乘至五鼓向都昌大路竄去彭玉麟防其回竄函商總兵陳大富由東流抽撥千五百人協同吳坤修駐守並探知另股賊匪已陷都昌當派成發翔戰船二十一號赴援十五日趕至都昌排礮轟擊城賊不敵我軍乘勝登岸由大南門追至城根賊眾慌亂開東北兩門而竄立將都昌縣城克復查廣東惠潮嘉道彭玉麟力捍危城

維持大局洵屬調度有方副將成發翔樸實果敢都司丁義方膽識過人部署迅速均應先行開列懇恩獎勵陣亡把總李逢貴軍功吳脩霖均請飭部照把總例從優議卹其餘在事出力將弁可否准臣擇尤保獎出自聖主鴻施上諭廣東惠潮嘉道彭玉

麟赴援湖口數日之間將大股悍賊擊敗力保危城並派兵克復都昌縣城洵屬調度有方著交軍機處記名遇有按察使缺出題奏副將成發翔著賞給協勇巴圖魯名號都司丁義方著以參將補用並賞加副將銜陣亡把總李逢貴軍功吳脩霖著交部照把總陣亡例從優議卹其餘在事出力將弁著曾國藩擇尤保奏候朕施恩○諭軍機大臣等田在田奏擒匪圍撲碭城卽時擊退並分布堵剿一摺據稱賊由河南夏邑縣之韓道口竄至碭山黨與數萬圍繞縣城經該縣勇練擊退並拏獲匪黨趙虎訊知該逆五

旗並出欲到碭山盤踞抗拒官兵另股捻逆由澮南向東竄踞羅集圩寨欲由懷定一帶接引張龔兩逆併拒北路又伊興額見招馬勇徐宿前敵等營均已併歸伊興額營等語捻匪招集黨與欲赴碭山意圖併力抗拒東省大軍僧格林沁見派兵在金鄉魚臺等處紮營堵截著卽督飭官軍聯絡鄉團嚴密防剿毋令闖入東境伊興額在徐州辦理團練仍歸僧格林沁節制見在該員招集馬隊爲數較多應需糧餉是否由山東糧臺支給如有不敷自應由徐州糧臺接濟惟據田在田奏各營積欠甚多見在裁兵節餉恐亦不能兼顧伊興額係辦理團練或另有經費可以支發著僧格林沁等查明酌量辦理俾該員馬隊及早整齊以便合力進剿是爲至要將此由六百里諭令知之○曾國藩奏臣於上年九月調集鮑超張運蘭兩軍進偏休甯分紮西館迪祥湖一帶因上溪

口江灣兩處爲賊南竄之路當於徽防調撥數營令已革副將楊名聲整理成軍駐紮上溪口並飭副將王夢麟所帶良勇協同副將程永年兵勇合紮江灣以資扼守自十一月十四日鮑超一軍由西館撤赴景德鎮之急而上溪口江灣兩處防兵頗形單薄正深焦慮據楊名聲稟稱十六日休甯賊匪四五萬人分路來犯上溪口南岸之賊被我軍槍礮環施遂涉水過河併力夾攻北岸營盤都司譚加耀帶隊往來鏖戰斬馘數百人該逆絕無退意楊名聲俟其氣餒正欲督帶馬隊由南岸前往策應該逆突出一股從街市之後繞來撲犯千總胡明昭棄營而走各勇登時驚擾楊名聲親堵濠邊手刃二勇眾心稍固而北岸諸軍又被賊圍楊名聲馳馬過橋接應被騎賊從後追刺受傷落水各營弁勇傷亡過半不敷守禦持至酉刻南北各營先後失陷又據王夢麟稟稱十四

日屯溪賊匪撲犯江灣被我軍擊退十五日該逆大股傾巢而來王夢麟飭各軍憑營固守程永年親督守備馬登榮等率弁勇三百人往來鈔擊逆眾始退忽分數十股由遠山繞赴江灣村市散紮復於村頭各處築卡王夢麟卽督帶馬登榮等回村鏖戰該逆死力相持馬登榮怒馬衝擊中槍陣亡外委鍾洪興楊大榮亦沒於陣李金山又受矛傷正鏖戰間忽報賊眾圍撲我營王夢麟恐營盤有失卽帶隊回顧各營賊以木石堆卡阻我迎擊之路王夢麟諭令各營奮勉出戰賊仍重重圍裹不得已會商程永年督軍巷戰分路衝出以圖再振江灣營盤遂陷查江灣上溪口兩處均屬要隘一有疏失則藩籬盡撤賊得長驅以入江西已革副將楊名聲副將王夢麟程永年駐防數月有險可扼乃不堅守待援實屬怯懦無能王夢麟程永年均應請旨革職不准畱營楊名聲係

業經參革之員亦不准畱營潰退兵勇交署湖北提督江長貴收
集整理陣亡員弁應請分別議卹以慰忠魂 上從之○曾國藩
奏僞忠王李秀城上年十月率大股突擾黔縣經鮑超張運蘭擊
敗後繞入徽城旋竄婺源擾及玉山而羊棧各嶺外賊蹤時復麇
聚窺伺祁門北路 臣飭參將楊鎮魁遊擊蔣信玉分帶兩營協同
參將張應超一軍在距羊棧嶺十里距黔縣二十五里之盧村駐
紮十一月十七日逆目古澧蘆等糾合大股分三路突犯羊棧桐
林二嶺乘霧入卡遠鈔盧村諸營之後我軍閉壘堅守張運蘭派
隊往援楊鎮魁等開壁齊出併力夾攻斃賊三四百人賊由新嶺
遁去十九日嶺外添賊萬餘於盧村左側築造二壘爲久踞以犯
祁門之計時鮑超援景德之軍因阻雨尙在祁門遂派副將宋國
永率隊馳赴黔縣二十日諸軍會合分路鈔擊賊勢大潰跟蹤追

殺伏屍徧野餘匪緣崖紛竄逃出嶺外自是嶺外之賊不敢內犯而休甯城中之賊因鮑超回剿景鎮我軍益孤賊勢益張張運蘭思所以懲創之二十四日派易開俊劉松山朱紹輝帶隊分路接洗而進行至小溪該逆列隊鏖戰我軍大集賊勢不支乘勢追殺斃賊約三百人把總賀元峯力戰陣亡餘匪退踞藍田又有另股萬餘自浙而來在鄧公橋一帶屯聚與休甯之賊互相聲援逼近漁亭一路臣因鮑超撤退後惟漁亭爲前敵最要之區飭令張運蘭派湘勇兩營宋夢蘭帶安勇兩營又畱霆字四營合紮漁亭以厚兵力二十六日逆眾萬餘徑犯漁亭見我軍出擊踞橋抗拒我軍分路鈔殺該逆不敵奪命狂奔追至崖腳斬僞宰相僞宣傳僞將軍僞指揮四名老賊千餘名忽上溪口之賊從南路來犯我軍遂自東路收隊回營申刻賊眾萬餘衝至漁亭街口婁雲慶等分

路掩殺至牌頭嶺日已向暮陳青雲等督隊過嶺追至當金街山路險窄不能排隊陳青雲胡克勝衝入街內遇伏陣亡婁雲慶等各督本隊截殺伏賊數百名收隊回營查黟縣各軍十日之內凡四大戰東奔西救有戰皆捷盧村一股該逆精銳殆盡尤足以寒賊膽而快人心至臣在祁門賊分三大枝環擾其西一枝經臣派鮑超赴景德鎮與左宗棠會剿賊自景德退至石門洋塘一帶仍分黨擾建德彭澤卽湖口之賊亦尙屯踞張家嶺一帶其東一枝由婺源開化竄撲玉山縣城十一月晦日十二月朔日城中竭力防守未知能否迅速解圍其北一枝經十一月間疊次痛剿見尙未敢再犯如能將西路一股大加懲創自可分兵援應東路不使深入江西腹地皖南軍務可期日有起色報聞○以江南徐宿剿匪出力賞總兵官田在田提督銜道員吳棠按察使銜○予安徽

陣亡知縣楊志伊等祭葬世職○丙申袁甲三奏臣前次奏請以東豫徐宿剿擒諸軍均歸僧格林沁節制與臣南北夾攻仰蒙採納命與僧格林沁隨時函商統籌全局伏思僧格林沁奉旨駐軍東境急切不能南下近據探報擒逆仍圖結夥北犯欲以全力抗拒北軍直東在在可慮僧格林沁止可暫駐濟甯如銳意深入賊股紛竄靡定萬一繞出其後必致兼顧不遑進退維谷其患不可勝言獨是擒匪勢已燎原若非及早撲滅豈惟東豫直各境岌岌可危卽沿淮各營亦腹背受敵進不可戰退不能守一旦藩籬頓開擒逆與髮逆句合爲害更烈僧格林沁一軍兵數並不甚多非厚集旣恐不敷戰守欲添調又恐難籌餉精必得就近素練之兵熟悉賊情者與之併力合謀乃能操必勝之權而制賊死命此北路兵力不足不可不豫籌也至長淮爲南北關鍵必須振領提綱

有高屋建瓴之勢乃能一氣貫注操縱自如見在皖省情形六安以南歸楚師防剿壽州以上翕同書主之臣扼紮臨淮勢處下游上下千餘里隔絕既多運掉不能靈動卽臨時難以策應聞新任臬司李績宜智勇深沈極有權略且久歷戎行精於用兵在楚營督師剿賊入皖日久情形熟悉特一時不能到任卽令到任而責成不專不能盡其所長亦屬無功況近日團練構釁非有大權以鎮之將排難解紛之不暇又安能專心防剿此南路事權不一不可不豫籌也爲今之計得撫藩臬長於武略者軍務地方合爲一家據上游以控制全淮則勢順而易爲力再得苗沛霖李世忠兩營素相浹洽者拊循激勵而用之亦可收相助之效無須以大隊客兵徒滋掣肘兼糜糧餉也查楚師向稱勁旅爲羣醜所憚胡林翼練兵籌餉志切澄清且知非清皖不能保楚數年來不分畛域

爲埽蕩江淮之計其所見甚大而所謀甚遠也特恐皖撫與楚師
劃爲兩家不相聯合莫若卽以李續宜授爲安徽巡撫賁令督辦
安徽軍務在楚營不過少一帶兵之人而皖省督辦與楚師呼吸
靈通必能聯貫一氣大振軍威至臨淮上下目前旣無進剿之機
止須水陸數千以資扼守聯苗李兩營以爲輔助第必駕馭得人
乃不至互生猜忌且事歸皖撫統轄以藩臬分任之更能指臂相
聯查撤任河南藩司賈臻勇敢任事有幹濟才前在皖營最久素
爲苗沛霖李世忠所信按察使銜補用道張學醇在臣營帶兵數
年頗諳戎機且屢與苗練會合剿賊精明幹練極有作用若以賈
臻爲安徽藩司以張學醇爲安徽臬司均令駐防臨淮籌兵督練
必能與李續宜協力同心相助爲理長淮可以無慮卽賊蹤不至
北趨臣於此時藉可分身計抽見有之兵可得精銳七八千人赴

徐州一帶擇要駐紮期與僧格林沁聲勢聯絡不必再調未練之兵亦不必另籌格外之餉卽以臣營與僧格林沁見需餉數責令各督撫不准絲毫欠解士馬自可飽騰臣與僧格林沁隨時察看賊勢或前後策應或左右分擊再得徐豫兩軍爲之輔翼以扼旁竄不但北路可以屏蔽捻匪亦可計日蕩平矣黜陟之權非臣所敢妄擬而軍務利鈍所關一轉移間南北大局均有裨益又何敢隱忍不言儻蒙 聖明垂察俯如所請卽懇飭下該員等剋期來皖俾臣得與籌商一切布置妥善然後統師北去不至有回顧之憂至翁同書張光第皆老成穩練爲大吏中不易得之人應如何另候簡用出自 乾斷不勝悚切待命之至 上諭軍機大臣等本日據袁甲三奏通籌剿匪大局請酌量變通業經明降諭旨令翁同書張光第來京另候簡用並授李續宜爲安徽巡撫賈臻爲

布政使張學醇爲按察使均著卽赴新任毋庸來京請訓矣據奏
皖省地方大吏旣得其人則長淮可以無慮賊蹤不至北趨該大
臣藉可分身赴徐州一帶駐紮與僧格林沁聲勢聯貫再以徐豫
兩軍爲之輔翼捻匪可以計日蕩平各等語實爲通籌大局起見
僧格林沁駐軍濟甯係屬北路屏蔽節據奏報捻匪有分股抗拒
之信尤宜加意嚴防斷不可銳意深入致令根本空虛難於回顧
袁甲三如能移師徐州北路兵力較厚與僧格林沁合謀併力先
將捻匪節節掃除然後會商進剿機宜庶可萬全無弊至臨淮爲
南北關鍵扼守最要袁甲三若遽行撤動亦恐逆匪乘虛竄撲必
須俟李續宜等到任後會商布置一切妥協派委得力大員在彼
鎮扼然後可以抽兵赴徐張光第見辦皖省糧臺所有經手未完
事件須俟新任藩司賈臻到後接替有人方可飭令交卸將此由

六百里各諭令知之○命翁同書來京以李續宜爲安徽巡撫張

學醇爲安徽按察使

由候補道遷

○召張光第來京以賈臻爲安徽布

政使

前河南布政使

○袁甲三奏苗練前次扣畱

臣

營餉船本在苗沛霖

患病期內旋即聞知愧悔懇將餉船送還

臣

查該練人眾本屬良

莠不齊既能悔罪知非自應概免深究至與壽練構釁尋仇一案

臣會同翁同書秉公查辦並恭錄上年十二月二十一日諭旨宣

示該練等知感知懼不至別滋事端

臣

等仍飭苗沛霖約束練丁

協同官兵剿賊以靖地方報聞○丁酉諭內閣崇實奏遵旨查明

應結各案先行具奏一摺已革署四川總督曾望顏既據崇實查

無受賄情節著卽飭令回籍前任四川總督王慶雲既誤參陳彥

坤於前復思諉卸於後前任成都將軍有鳳於派審要案大員不

令審辦完結均有不合除有鳳業經病故毋庸議外王慶雲並委

員四川候補知府長敬鄧承彬徐錫金候補知縣王應昌均著交部分別議處革職畱任四川按察使蔣徵蒲督兵日久無功著送部引見候補直隸州知州伍雲錦雖訊無與本地紳士聯姻及浮冒兵餉情事惟辦團滋擾貪鄙不職著卽革職已革四川成綿龍茂道濮詒孫已革合州知州陳彥坤均著卽行勒令回籍不准在四川逗畱嗣後凡有因案參革之員俱著照此辦理不准逗畱該省以杜夤緣而肅吏治布政使祥奎知府史致康前敘州府知府英匯宜賓縣知縣汪覲光旣據訊無營私激變各情事均著免其置議○諭崇實奏請畱撤任提督帶兵並委撤任知府辦理團練等語四川提督占泰前因帶兵恇怯無能貽誤地方當經將該員撤任交崇實查辦茲據該署督查明川省軍務遷延係由已革知府田良牽制復因曾望顏咨調占泰回省致失城邑尙非該提督

有心退避著准其畱營效力如再不知愧奮卽同邵桂芳所控之
案一併從嚴參辦前四川成都府知府楊重雅前因私抽邵桂芳
呈詞亦經該署督奏參撤任聽候審辦見在邵桂芳查無下落該
員平日官聲尙好著卽督飭認真辦團並催提邵桂芳到案訊明
定擬以成信讞○翁同書奏川北道苗沛霖上年攻克鳳陽後欲
袁甲三移軍蒙城未經邀允該道卽心懷不服出言不遜又以賞
犒過薄保舉未優袁營扣伊糧價阻伊販鹽時形怨望臣恐激成
巨患一面飛致袁甲三一面函商苗沛霖極力調停又因其助官
勦賊於兵餉萬絀之時撥濟雜糧二萬餘石追攻破程圩優加賞
犒該道於臣營並無間言不意伊赴蒙宿一帶爲捻匪所敗遁回
老寨忿戾復萌藉詞投稟語多不經並稱擬將長淮上下關卡一
律歸苗營充餉臣與袁甲三以其擁眾恃強止得致書婉阻而該

道已紮營下蔡堵塞河道挾制兩營爲之設局抽釐又以私忿焚掠練總徐立壯等之家發墓露骸殺武進士蘇姓偪辱署宿州知州董聲元肆詆河南撫臣慶廉及袁甲三近復令人赴沈邱縣境煽惑各寨付紅旗十二面以作表記各寨未敢允從又往河南光州五屬恐嚇勒捐狂妄情形不可枚舉至壽州與鳳臺縣同城苗沛霖原係鳳臺生員前年欲擁眾入城署鳳臺縣知縣姚德賓勸其少減從騎伊卽忿怒檄令城中將姚德賓細獻否卽屠城適臣移軍到壽爲之和解得以息爭乃自上年冬閒苗練在下蔡築營偪勒城中局董欲細送紳士員外郎銜孫家泰闔城驚駭十一月城中團練殺苗練七名並不請官定奪臣飭令知州任春和查訊據稱係販濟賊馬不服盤查爲練眾格殺臣一面函諭苗沛霖聽候查辦一面飭令廬鳳道才字和秉公嚴訊不意苗沛霖不候訊

斷屢次發隊焚掠闕廂殺害行旅近日又將袁甲三營中兵米銀錢破船盡行掠去查該道桀驁皆在 聖明洞鑒之中而此次起釁究由壽州團練之擅殺練董員外郎銜孫家泰賦性剛愎不顧大局咎無可辭相應請旨將孫家泰革去職銜以便提同人證嚴行訊辦苗沛霖跋扈不馴深駭物聽但其練眾過多操之過急適以激變若姑息因循又恐尾大不掉爲害滋深應否大加懲創抑仍暫事羈縻應恭候諭旨遵行至正陽等處流言四起經臣派兵靜鎮尙屬安謐惟兵力尙單擬日內親往彈壓見仍時諭苗沛霖勉以忠義並令人至下蔡開導冀可不至決裂再官軍借苗練以制捻彼亦臣勢以號召其平日勦捻時有挾仇報復附之者多非心服故激而從捻者愈眾臣前遣委員黃殿楨親至楚店集面見逆首孫葵心據稱我等所不服者苗練雖有意歸誠終恐爲其

所害亦實情也撫捻而不歸苗練則必互相吞屠撫捻而盡歸苗練又恐愈滋流弊臣有守土牧民之責不敢不據實附陳上諭軍機大臣等壽州團練殺害苗練以致尋仇起釁練董員外郎銜孫家泰著革去職銜交袁甲三提同人證秉公嚴訊苗沛霖跋扈情形本應懲辦惟據袁甲三奏苗沛霖已將餉船送還該員既知悔罪不必操之過急惟將練勇尋仇一案剖斷平允自能折服其心翁同書因正陽等處流言四起欲親赴彈壓恐壽州空虛爲該練勇所踞亦不可不防翁同書已降旨令其來京李續宜尙未到任該大臣務須妥籌兼顧毋令練眾滋事是爲至要另片奏孫葵心不服苗練恐歸誠後終爲所害等語孫葵心與苗沛霖不合故意存觀望此事亦須辦理妥協方無流弊賈臻見已授爲安徽藩司著袁甲三卽令其迅速赴任督飭該藩司辦理招撫孫葵心事

宜毋得稍涉遷就致滋貽誤翁同書原摺片均著鈔給閱看將此
由六百里諭令知之○調麟興爲工部左侍郎以清安爲盛京工

部侍郎

由內閣學士遷

○以蕭汝蘭爲四川按察使

由甘肅甘涼道遷

○戊戌諭

內閣朕此次回鑾並恭謁

東陵禮成後駐蹕避暑山莊凡蹕路

經行及中伙處所業經由總理行營王大臣傳諭直隸總督順天

府府尹止須一律平墊毋庸照舊例加細墊修惟該地方官吏往

往藉辦差爲名苛派民間車馬夫役近年直隸地方兵差絡繹民

力拮据若再以差徭擾累閭閻朕心實有不忍著直隸總督順天

府府尹嚴飭各該州縣不得藉端勒派儻有陽奉陰違者卽行查

明參奏至扈從人等車馬繁多尤不得踐踏禾苗致妨小民東作

並著通諭各該衙門扈從官員及兵丁等一體懍遵○己亥以廣

西梧州勦匪出力擢道員蔣益澧爲按察使賞副將高連陞巴圖

魯名號餘升敘有差○劉長佑奏石達開悍黨僞國宗石鎮吉逆甥黃貴生僞宰制陳于麟等前撲百色廳城經兵練擊敗折回慶遠路過安定爲該土司潘梧所擒解送思恩府署知府徐引因賊氛喫緊原擬將該犯等在府正法旋以道路稍通解省究辦臣督同司道親提研審據該犯等供認先同石達開擾犯江南江西各省嗣自福建與石達開分股竄陷廣東湖南沿邊各州縣直至桂林皆石鎮吉爲首石達開後由寶慶來會潰赴慶遠石鎮吉復踞寶州趨攻百色致被擊敗擒獲等情當將該犯等凌遲處死以彰天討報聞○胡林翼奏兩江督臣曾國藩上年調總兵鮑超等軍渡江剿辦皖南賊匪派曾國荃曾貞幹畱圍安慶牆濠深堅賊勢漸已窮蹙探聞逆首陳玉城復糾約李秀城併力西犯其大股賊匪均從南岸渡江而北會於無爲廬江以圖急援懷桐提督楊

載福副都統多隆阿臬司李續宜前因安慶樅陽日有警變於十
二月初八日會集樅陽安慶相度地勢審量賊情布置已定其多
隆阿李續宜二軍仍堅扼桐城以備援剿臣於十二月十三日紮
營太湖以順後路兼與前路桐城驛報捷近報聞○庚子子陣亡
副將劉坤山等祭葬世職○辛丑杭州將軍瑞昌等奏賊竄孝豐
省城可危得旨省垣固屬緊要然近防不如遠剿仍應迅籌撥兵
抵禦○壬寅 上御勤政殿賜近支親藩等宴○諭內閣國家發
政施仁尤在欽恤庶獄朕自臨御以來兢兢業業惟願與吾民同
臻上理而兵戈未息臣困未蘇仰荷 天 祖付託之重未嘗不
刻責自深痼癥在抱上年朕三十慶辰業經頒詔各省軍流以下
人犯俱減等發落並將秋審緩決三次及一二次人犯分別查辦
矜恤之心內外臣民諒已共喻粵稽乾隆十一年嘉慶十一年均

特頒省刑

諭旨大沛

慈恩亦越道光十一年

皇考宣宗

成皇帝紹述

前徽復頒行

曠典朕以涼德寅紹丕基茲當紀

年開秩允宜祇遵

成憲以冀消沴戾而迓祥和所有刑部及各

省已經結案監禁人犯除情罪重大及常赦所不原者毋庸查辦

外其餘著大學士會同刑部酌量案情輕重分別減等請旨發落

其軍流徒杖以下人犯一併分晰減等完結俾霑寬大之恩勉圖

自新之路用副朕赦過宥罪子惠黎元至意○江西巡撫毓科奏

饒州浮梁府縣兩城被匪闖入旋經三品京堂左宗棠督兵擊退

得旨嘉獎○甲辰 上御勤政殿賜王大臣蒙古貝勒貝子公額

駙台吉等宴○乙巳 上御福壽園賜御前大臣御前侍衛乾清

門侍衛等食○諭內閣本日據巴棟阿等奏參喬松年將前任藩

司王藻交款以三成解交北臺以一成解交南臺不知緩急且於

口岸地方添設水師釐局與前議不符各等語鎮江軍務緊要前經諭令辭煥於王藻許敦詩應交款項內先提銀十萬兩交江南糧臺以濟急需見在王藻交錢三萬串合銀一萬八千一百八十餘兩自應先儘南臺提用喬松年僅撥出一成其餘三成俱歸江北糧臺殊未允協所有已交北臺之款著卽如數撥歸南臺其餘未繳之款並著嚴催速提遵奉前旨先其所急解赴鎮江軍營應用昨據喬松年奏請將此款分成勻撥並未將王藻已交之款詳細聲明且未候諭旨輒卽分成提交殊屬不合喬松年著交部議處至口岸釐局前據喬松年奏稱與民不便業經諭令巴棟阿停止何以江北復添設水師釐局並著喬松年明白回奏○命直隸天津道孫治專辦天津河間兩府團練事宜○丙午諭軍機大臣等本日據色克通額奏接木哩斐岳幅與軍機大臣咨文代爲呈

遞一摺文內大意以俄國上年在京所定條約第四款有交界各處准許兩國所屬之人隨便交易並不納稅黑龍江將軍副都統並不遵照辦理各等情該處何以不照條約辦理必須查明以免藉口著恭親王奕訢等卽行文特普欽等令其按照條約第四款出示曉諭該處商民互相貿易卽由該大臣等酌量咨覆○諭會國藩奏部文到營較遲請飭軍機處將所奉諭旨隨摺鈔發等語軍機處事紛繁各處奏報摺件所奉諭旨勢難概行鈔錄隨摺封發至軍營保舉所奉諭旨字數較多尤難卽時鈔發嗣後該大臣奏報凡緊要事件或關係缺分者由軍機處鈔錄諭旨附報發給其保舉各案接到軍機處知會卽可於部文未到以前遵照辦理至奏摺尋常事件仍著聽候部文知照也將此由五百里諭令知之○會國藩奏湖南一省向稱瘠苦之區年來防剿本省援應

鄰封兵勇分道四出而餉精猶能爲繼良由經理得人取民有道
前助剿江西協濟黔粵歲費百餘萬兩久在 聖明洞鑒之中本
年夏間 臣與左宗棠在湖南招募勇丁數近二萬餉項軍裝爲款
甚鉅皆由湖南竭力協濟得以從容集事 臣以一省之物力止有
此數協助別省者日多則供給本省者日少此有所盈則彼有所
缺本不欲再用湖南之餉致蒙竭澤而漁之譏無如添募勇丁添
製槍礮添造船隻在在與湖南交涉不得不藉資湘中之力以濟
皖省之師爰與湖南撫 臣熟商札飭臬司裕麟道員黃冕鄭元璧
等會同藩司文格在於長沙設立東征局凡鹽茶貨物酌抽釐金
於商民稅則所增無幾而於本省釐務兩不相妨 臣與官文胡林
翼等所統各軍同係東征之師同值缺餉之際議定東征局所籌
餉項以三分之二解江西糧臺協濟皖南一軍以三分之一解湖

北糧臺協濟皖北一軍又會同遴派官紳設立分局襄同辦理本年七八月內次第開局臣以隔省籌餉事涉繁難未敢遽行入奏九月間規模漸定眾情胥協洵屬力拯時艱著有成效惟是另設一局與本省抽釐不同凡鹽茶各商抽收較多者應倣照江西茶捐之例給予獎敘近歲以來屢蒙我皇上諭旨褒嘉湖南官紳有裨大局今茲時事彌艱猶能多方籌措謀及皖吳之師雖出自該局官紳報國微忱亦足見聖主仁言感人之深有以激發於不自己者也得旨允行○廣東巡撫耆齡奏克復平遠縣城報聞○恆福以病免以文煜署直隸總督賞譚廷襄二品頂帶爲山東巡撫未到任前以布政使清盛署理調鄧爾恆爲陝西巡撫未到任前以布政使瑛瑩署理賞何冠英二品頂帶署貴州巡撫由貴東道署○子江蘇殉難內閣中書趙起建祠江南殉難鹽運司經歷謝

監昇等祭葬世職○丁未僧格林沁西凌阿國瑞奏上年十二月間探聞捻匪五旗並出欲撲濟甯軍營臣等移師濟甯迤南唐家口一帶駐紮因該處有牛頭河一道東西綿長八十餘里堪以扼守旋據曹單金鄉等處紛紛告警請兵救援臣等卽於本年正月督帶馬步隊取道金鄉探報捻匪在距金鄉四十餘里之白福園及田家集等處盤踞初六日大股向西北奔竄臣等督隊跟追十一日追至荷澤縣屬之關李家莊地方逆眾四五萬人列隊抗拒臣等以馬步隊分南北中三路進剿槍礮連環斃賊無算該逆愈聚愈眾我兵因連日奔馳沿途無食飢疲萬狀自卯時戰至午刻步賊冒煙而進馬賊兩旁鈔襲副都統銜舒通額督帶馬隊將北面之賊擊回而步賊已撲入中隊我軍短兵接戰正在相持南面之黑龍江馬隊陝甘步隊力不能支先行退後兵力益單中北二

隊被該逆圍繞勢難支持均卽潰散槍礮器械遺失多件二品頂帶察哈爾總管伊什旺布登時陣亡應請旨交部議卹以慰忠魂臣等調度乖方應請旨交部嚴加議處至歸化城副都統桂成統帶陝甘官兵黑龍江協領色爾固善管帶馬隊接仗時督隊不力首先敗退應請旨革職畱營戴罪圖功見在擒匪仍在曹縣一帶游弋臣等因地方蹂躪人馬無處覓食已回駐唐家口收集官兵整理器械再圖進剿至陝甘官兵不能得力見擬詳加選擇分別革退遣撤惟旣經開除兵力更單查東省鄉民較爲勇敢擬卽隨時招募充補以厚兵力 上諭軍機大臣等僧格林沁等督帶重兵北地倚爲屏蔽朕惟恐該大臣銳意輕進疊經有旨諭知自應倍加慎重一聞該匪入境卽當前後布置謀定後戰乃奔馳數日率飢疲之卒當方張之寇後路旣無援兵左右亦少策應以致爲

賊所乘勇往雖有餘惜尙未能持重也該大臣見在收集潰兵回駐唐家口著卽將不得力官兵嚴加裁汰招募充補一面聯絡民團扼要嚴防毋令該匪再行北竄本日已諭知袁甲三派撥兵勇會同田在田伊興額等實力截擊並牽制捻眾後路至該匪人數眾多皆係烏合伊興額於徐宿一帶素得民心著卽飭令激勵鄉團相機堵禦並解散脅從設法招撫捻眾以孤其勢俟袁甲三移營徐州以後再與商定機宜會同勦辦方有把握此時總不宜輕進再蹈覆轍昨恆福摺謂該大臣未可輕易直前所奏不爲無見著鈔給閱看將此由六百里諭令知之○命河南按察使鄭元善畱省專辦團練事宜毋庸幫辦毛昶熙軍務○以山東荷澤勦匪失利僧格林沁等下部嚴議革副都統桂成協領色爾固善職畱營效力于陣亡總管伊什旺布祭葬世職○戊申 上御萬樹園

大帳次賜王大臣官員蒙古王貝勒貝子公額駙台吉等茶果○
庚戌諭軍機大臣等皖省捻匪滋事以來疊經官軍勦辦斬馘甚
多而此勦彼竄蔓延東豫愈聚愈眾本應悉數殲除以彰撻伐惟
念此中良莠不齊其被匪裹脅並非甘心從賊者正復不少若概
行勦辦恐人數眾多久煩兵力且該捻爲粵逆前導抗拒官兵身
罹鋒鏑之害而粵逆則坐享其利其愚亦屬可憫著袁甲三穆騰
阿鄭魁士毛昶熙李續宜嚴樹森於皖豫境內剴切曉諭解散脅
從有能悔罪輸誠自拔來歸者概予免戮其中如有才具可用者
並酌量錄用卽如李世忠自投誠後屢立戰功朕卽擢至提督該
捻首若能殺賊立功亦可渥膺懋賞儻始終抗拒執迷不悟惟有
嚴行勦洗亦不能任其猖獗李續宜嚴樹森身任封疆尤當督飭
地方官辦理招撫安插事宜俾解散之民各復本業不至再爲裹

脅方爲妥善孫葵心投誠一事前已有旨令賈臻迅赴皖省辦理該擒首於賈臻素所信服著傳諭該藩司遵奉前旨迅速妥辦毋稍遷延至徐宿一帶情形田在田滕家勝伊興額俱所素悉著卽會同商辦勦撫並用俾該匪等自新有路庶免概遭殺戮吳棠久任淮徐素得民心於招撫解散事宜尤當與田在田等會商妥辦此事從前歷次頒發解散脅從諭旨各路統兵大員及各該地方大吏並未實力奉行此次袁甲三等務須實心辦理不得視爲具文仍著整飭官兵如有始終頑梗必應勦辦者卽行督兵殲除亦不得因有此旨致懈軍心將此由六百里諭知袁甲三穆騰阿鄭魁士毛昶熙李續宜嚴樹森田在田滕家勝吳棠並傳諭伊興額賈臻知之○諭安徽一帶擒匪擾及東豫到處勾結裹脅良民以致愈聚愈多此勦彼竄朕思此輩烏合雖眾未必皆甘心從逆之

人若概予誅夷朕心實有不忍李世忠自投誠之後屢立戰功爲國宣勞是以擢至提督該員於擒眾頭目多所素習其中必有情願投誠而自知罪重意存觀望者若能宣示朕意使其自拔來歸必當寬其既往如有率眾歸誠助兵勦賊者更不難立沛恩施以彰激勸至怙惡不悛負隅抗拒者惟有嚴飭各路官兵認真勦辦亦不能任其猖獗也該提督忠勇性成務必仰體朕心盡心籌辦儻能招集擒眾併力攻勦粵逆克奏膚功更膺懋賞實於該提督有厚望焉○辛亥雲貴總督劉源瀚奏克復獨山州城報聞○以貴州長寨廳城被匪竄陷革副將賈連陞等職畱營差委子陣亡同知劉宗元等祭葬世職建祠○壬子翁同龢奏查苗沛霖始則倚官徇民繼且挾眾抗官所到之處錢漕不能開徵詞訟不由官斷聚財無饜足殺人如草菅徇令紳富大戶將妻子遷入老寨爲

質勒索不遂則闔家戕害又於蒙城宿州擅立公局私設公案任

意殺戮近在潁州殺

臣

差弁千總韓登喜及步兵王鳳鳴欲劫所

解餉銀並在兩河口搶劫同知史久恩銀物將該員擄至下蔡勒

贖種種跋扈駭人聽聞以致強梁者從之如雲不服者去而入捻

日勦捻而捻愈熾職此之由見接袁甲三鈔送苗營信稿狂悖詆

欺實堪髮指所稱

臣

曾諭拏伊營之人其言毫無影響

臣

方出示

禁殺苗練冀弭爭端豈期憑空誣捏希圖聳聽

臣

因南北皆當多

事之秋不肯再任沿淮團練同室操戈重煩

聖慮是以極力調

停冀兩造各知悔過乃

臣

貽書勸慰至六七次苗沛霖一字不覆

又接袁甲三密函知苗沛霖遣人赴勝保營中投稟內稱孫家泰

徐立壯拘囚巡撫不許官軍進城並強奪其印明調官軍暗勾髮

逆等語尤堪駭笑其所以流言惑眾者實因

臣

在壽城未便公然

犯順是以任情污蔑至於壽紳與苗練均有罪狀而輕重大小昭然可見臣已函催袁甲三派大員來壽將紳練激變之處秉公查辦絕無徇庇而苗沛霖怙惡不悛亦豈容養癰貽患邇來遠近士民聞伊桀驁皆不樂爲之用但能仰邀乾斷詔書一下軍心民心自必倍加踴躍除惡務盡惟力是視臣軍雖飢疲然勉以忠義無不人思效死本月初一日下蔡苗圩發隊水陸並進內有所掠臨淮礮船二十餘隻直撲壽州城下傷我勇二人當經副將黃鳴鐸飭令開礮將匪船擊回初九日又有馬步千餘過淮焚掠殺傷民人無數擄去婦女數十名臣正欲出隊其眾已遁回下蔡疊據參將韓殿甲等偵探並合肥北鄉練董密報苗沛霖勾結廬州粵逆遣僞官余浚琰許導奎趙大落赴苗練老寨會議欲攻襲正陽關臣惟不動聲色靜以待之連日出城操演隊伍整齊夜間派弁

兵登陴巡守亦無疏懈苗沛霖聲言具三月糧攻壽州城先絕餉道殺傷商販臣紮營河口淮河始通特糧餉不繼兵力尙單乞飭

下河南山西陝西三省源源接濟月餉並飭湖北巡撫胡林翼撥

精兵二千名駐紮三河尖協同防剿以固楚豫而壯聲威 上諭

軍機大臣等苗沛霖種種跋扈實屬形同叛逆難以姑容惟其手下人數眾多操之過急轉恐立啟釁端著袁甲三嚴密訪查如果苗沛霖自知悔悟原不妨暫事羈縻若如翁同書所奏桀驁情形怙惡不悛士民皆忿且有勾結粵逆攻擊正陽之說亦宜防患未然不可一味姑容以致養癰貽患翁同書已令來京李續宜見授皖撫壽州地方緊要設有疏虞所關非細本日已諭令胡林翼派撥精兵二千名駐紮三河尖協同防剿李續宜到後即可分撥布置並察看苗練情形妥籌辦理固不可激之生變亦不可任其挾

制官長致成尾大不掉之勢壽營軍餉已諭令嚴樹森常續瑛榮
迅籌接濟矣翁同書摺片四件著鈔給閱看將此由六百里各諭
令知之○諭本日據文煜奏擒逆由鉅野分竄館陶荷澤徑撲曹
州府城護隄並攻破觀廟李莊等處前隊竄至直隸東明縣境由
武備岡向西南東明長垣等縣竄撲已分別咨飭直隸總督大名
鎮道派兵堵截復據聯捷奏稱擒眾竄至長垣縣屬三翟莊口東
明縣山里屯河口踏冰過渡均經練勇擊退見調鄉團於河岸防
堵各一摺擒匪大股竄徧直境畿南重地防務倍關緊要著聯捷
卽督飭兵練嚴扼河干斷不可任其徑渡儻防守不密致賊闖入
畿疆朕惟聯捷是問本日毛昶熙奏截擊擒股大獲勝仗見在匪
眾徧近直境蘭儀考城已有賊蹤毛昶熙當督帶兵各員追剿俾
擒逆有所牽制不敢徑行北趨如與聯捷併力迎頭截擊

善總期令該逆回巢毋任匪蹤闌入畿疆是爲至要將此由六百里諭知毛昶熙並傳諭聯捷知之○諭翁同書奏請飭撥楚兵協同防剿等語據稱苗沛霖因與壽州團練尋仇時思殺官報復聲言欲攻壽城並有句結廬州粵逆之語見在該前撫練兵守陴紮營河口尙無疏懈惟兵力尙單請飭湖北巡撫撥精兵二千名駐紮三河尖協同防剿等情苗沛霖恃強跋扈意存叵測已諭令袁甲三妥籌辦理前有旨令翁同書來京另候簡用授李續宜爲安徽巡撫見在壽州兵力尙單著官文胡林翼就近調撥精兵二千名派委得力將弁統帶駐紮三河尖以壯皖軍聲援而固楚疆門戶至胡林翼前保之同知劉蓉見在何處聞該員才具尙好應如何錄用之處並著胡林翼酌量具奏將此由六百里諭令知之○諭前因綿性奏變通私徵轉爲公用誠恐該伯克再行額外加徵

重累回人當交常清等體察情形悉心議奏茲據綿性奏稱阿克蘇回子生齒日繁影射之戶甚多非稽查明確不足以昭平允已派令回子郡王愛瑪特幫同章京國燭等查明三莊戶口並查有勒索錢文之七品伯克二名卽行懲辦等語變通私徵以充公用是否可行尙未據常清景廉覆奏綿性自應俟奉諭旨後再行查辦且甫經清查卽有伯克勒索錢文之事愛瑪特等亦難保無藉端需索情事著常清等嚴密訪查並將變通私徵有無流弊之處迅卽據實具奏將此諭令知之○癸丑諭內閣勝保奏已革大員捐輸銀兩據情代奏一摺已革江南河道總督庚長前因清淮被賊竄擾未能堵禦降旨令其來京聽候審訊自應靜候訊辦乃案尙未結輒先捐輸銀兩希圖加恩殊屬冒昧庚長所捐銀兩著卽擲還仍著迅卽來京聽候審辦○袁甲三奏遵查苗沛霖投稟勝

保軍營所稱徐立壯孫家泰不准官軍進城一節翁同書駐師壽州本不能盡紮城內且恐兵民雜處易滋嫌怨是以令官兵在城外紮營出入皆有稽察並非徐立壯等不准進城藉以挾制至謂徐立壯等拘囚巡撫強奪其印尤屬毫無影響徐立壯曾隨撫營帶練助剿經翁同書先保之而後參之孫家泰本駐壽城見經翁同書參革職銜其爲不受要挾已可概見又稱暗勾髮逆與苗沛霖打仗一節查潁壽蒙亳一帶徧地皆捻苗沛霖平日勦匪結怨亦復不少徐立壯曾與苗沛霖同事勦賊其底細皆所深知此時構釁尋讎人心洶洶其暗中勾捻報復亦在意中不能保其必無也苗練恃眾跋扈已在 聖明洞鑒之中自壽練擅殺復令有所藉口臣前已遣人委曲開導漸就範圍而彼此懷疑浮言四起見復添派新任臬司張學醇前往壽州會同廬鳳道才宇和迅速查

訊務期剖斷平允以折服其心至苗練前次截留臣營餉船頗有危不自安之意迨臣理諭情遣伊亦自知悔悟見因事無定局餉船仍未送還報聞○甲寅諭內閣上年諭令河南等省辦理團練並派督辦大員各就地方情形妥爲經理茲據御史吳祖昌奏兩廣幅員遼闊請飭合辦團練並於肇慶設局等語著照所請所有廣東廣西兩省團練事宜卽著兩廣總督會同廣東廣西各巡撫按照河南等省團練章程認真妥辦並於肇慶地方設立總局揀派公正官紳協同辦理毋得有名無實○諭軍機大臣等本日據嚴樹森毛昶熙奏豫省歸陳許鄭汝光地皆平陽無險可扼見自曹單竄往之捻已偪省城而歸德以南另股竄匪馬步逾萬省城官兵不敷守堵毛昶熙所部悉皆步勇馬隊不滿三百滿營之馬疲瘦不能禦敵賊騎我步攻難施請飭撥東三省馬隊二千名

來豫等語所奏自係爲利於鈔擊起見惟吉林黑龍江馬隊近年調赴各路軍營爲數過多實已無可再調見在捻匪由山東竄至直隸之長垣東明等境北路防剿尤關緊要卽有官兵亦難調赴豫省該撫等旣分飭各屬勸捐馬匹卽可挑選精銳官兵練習馬隊或招募馬勇以資攻剿刻下捻匪鴟張毛昶熙等惟當就見有兵力認真堵剿毋得專待客兵致有貽誤將此由六百里諭令知之○丙辰僧格林沁西凌阿國瑞奏自前次接仗後捻匪業經折回竄出東省邊濠十七至二十等日復有另股由歸德虞城一帶竄至荷澤縣地方查該逆更番肆擾臣等兩次迎剿未能得手原擬乘其竄出東境卽行移營前進守衛邊濠以扼東省門戶不料一股甫退一股復來蓋東省富庶該逆垂涎兵團扼守邊濠不能遂其擄掠是以屢次希圖牽掣見在荷澤一帶盤踞亟應督兵剿

除惟步隊行走遲延且器械尙未齊備已札調知府趙康侯並曹州等處團總各帶鄉團在鉅野縣屬大義集會齊臣等擬於二十五日督帶馬隊前往合力進剿儻能大彰撻伐餘匪竄出邊濠卽一面分布兵團逐段防守一面趕緊補築濠塹以資捍禦 上諭軍機大臣等捻匪更番出竄意在疲我兵力當此賊勢方張正宜謀定後戰克操勝算以期大挫賊鋒僧格林沁此次復親帶馬隊銳意輕進深恐再蹈從前覆轍著卽督飭各屬鄉團迎頭截擊並飛催步隊官兵相機策應該大臣身爲統帥指揮調度是其專責斷不可輕臨前敵屢冒危險俟此股擊退趕緊分布兵團防守邊濠遏賊來路以待袁甲三等分兵會剿兵力稍厚再圖進取方爲妥善將此由六百里加緊諭令知之○諭田在田奏壽州團練構釁見赴宿州鎮撫一摺據稱淮南團練殺傷苗練致苗練憤起爭

端淮北數百練圩紛紛糾眾構釁沙河渦河一帶新附各圩飢民乘機赴靈泗等處滋事宿南人心震動見經開導宿州民練將苗練旗號撤去並分撥兵勇在宿境東北駐紮一面馳回宿州鎮撫人心等語苗練與壽州團練構釁當經諭令袁甲三秉公查辦並妥爲安撫田在田見回宿州自係爲安定人心起見惟此時捻匪竄擾東境延及直隸東明長垣邊界本日復據僧格林沁奏稱此股捻匪雖已折回竄出東省邊壕而另股捻眾又復竄荷澤徐州爲東境藩籬較宿南一帶尤爲緊要苗練構釁一案見有袁甲三就近辦理田在田到宿後應卽折回徐州一帶與滕家勝吳棠等聯絡民團督率兵勇相機堵剿以遏捻逆北竄之路並與僧格林沁一軍互相援應以收夾擊之功毋因苗練牽掣致令北路空虛是爲至要將此由六百里各諭令知之○諭田在田奏撤退東勇

被圍眾格殺多名請飭查辦等語據稱傅振邦撤去東勇五百名行至泰安縣大汶口地方被民團截殺六十三名內有官兵三員遊擊傅萬清後至遇劉紹英認保未被砍殺旋據該縣知縣稟稱係因不服督查遽行械鬪其時南翼各團亦均捆獲多名實屬誤認爲賊田在田復遣守備趙典涵前往查訪行抵宋家莊亦被民團綁縛請飭山東巡撫確查訊辦等情民間團防原有盤詰奸宄之責惟軍營撤勇既有文憑可稽卽不得任意妄殺雖因兵丁過境人數浮多恐有匪徒濶入亦當報明該地方官辦理乃因不服盤詰彼此械鬪殺斃多名實屬兇橫不法知縣方振業事後查辦自應虛心詳察何以趙典涵約同查驗並不前往亟應嚴切根究著清盛卽派妥員確切查明是否該勇丁搶奪擾害傅萬清所稟不實抑係該處民團恃強滋事該知縣藉詞規避務須稟公勘究

按律懲辦以期兩得其平毋稍寬縱原片著鈔給閱看將此由五百里諭令知之○吉林將軍景濱等奏捕珠各河與夷務無礙得旨圖畱中著於十三年照例採捕今歲卽趕緊設法籌辦除必需之款仍照例支放外其餘可減則減通融辦理○丁巳翁同書奏壽城之殺苗練苗練之殺官弁議者謂宜兩懲之以持其平似矣而未盡也壽城殺苗練是巨案也禍無有烈於此者也苗練殺官弁是細過也罪尚有浮於此者也今縱兩懲之不過調停粉飾爾豈得謂此後遂可無事乎欲官有權必盡撤各城苗局而後可欲民無怨必嚴禁各圩領苗旗而後可欲長淮復通必速撤下蔡苗圩而後可然此令果下苗練必抗且爭爲患無已且臣苦心守土而竟敢誣指爲拘囚彼舉兵攻城尙不敢訟言其悖逆是非倒置有識寒心臣見按兵不動聊固吾圉欲振作則恐誣爲激變欲姑

息又恐議爲養奸進退維谷無所適從頃據合肥北鄉練總褚開泰稟稱苗沛霖遣人往廬州具稟該總練將其稟稿密呈有欲勾結髮逆搶掠壽州以南一帶並欲攻取兩淮山東河南地方等語此事所關重大謹將原稿封呈 御覽又本日苗練過淮築營迫脅民圩歸服 臣親往北門五里廟營盤屬令嚴防仍不出隊其壽州一案疊次催調才字和杳不見到袁甲三亦未遣員到壽會審 臣與鎮道各大員函致苗沛霖婉曲勸慰皆置不答至 臣營協餉絲毫不至者已五十日枵腹荷戈勢將瓦解可否請旨仍飭下山西陝西將月餉儘解 臣營並飭河南於協餉外另撥銀數萬兩速解壽州以濟眉急出自 天恩 上諭軍機大臣等壽州餉需不至者已五十日萍潰堪虞袁甲三昨奏請於皖省協餉內明定章程業經諭令各該省如數撥解壽營待餉孔亟該大臣自當不分

畛域著由臨淮軍餉內無論多寡先行通融勻撥以冀保全大局至苗沛霖偪脅紳富領旗並密稟內有欲勾結髮逆搶掠壽州以南一帶並欲攻取兩淮山東河南地方合肥練總褚開泰所呈苗沛霖稟彙是否實有其事或係壽州團練偽造希圖搆毀均未可知著袁甲三嚴密訪查如果苗沛霖有勾通髮逆之事亦宜不動聲色妥爲防範不可稍涉大意並嚴催張學醇才宇和將團練伏殺一案迅速秉公查辦毋稍延誤苗練見在過淮築營偪脅民圩歸服並著田在田伊興額確查該練動靜密爲防備切不可稍涉張皇以致激而生變翁同書密片一件苗沛霖稟彙並鈔錄摺片二件均著鈔給袁甲三閱看將此由六百里密諭袁甲三田在田並傳諭伊興額知之○諭勝保奏練兵籌費添置器械一摺據稱圓明園八旗包衣三旗兵丁入槍營操演者向止二千四百名見

擬於八旗護軍內挑出精壯兵一千四百名統共三千八百名並添置擡槍烏槍排槍刀矛馬槍號衣等件共需銀六千三百六十餘兩請於釐捐鹽價罰賠各項銀兩內提用或由部籌款一萬兩或八千兩發交該營等語已交戶部覈議具奏矣京營訓練兵丁添置器械除擡槍照數添置外其餘烏槍等件著該大臣再行覈減以節經費而務實際並覈實估計究竟統需銀兩若干詳細確查具奏毋得稍有浮濫將此諭令知之○賞已革大學士瑞麟四品頂帶辦理吉地工程○戊午諭軍機大臣等毛昶熙奏兵勇馬隊過單見擬每寨挑選壯丁一名騎馬一匹於到營後按照馬勇給發口糧事竣各回原寨等語捻匪馬匹甚多我軍馬隊過單僅恃步隊追剿勢難得力自應多添馬隊以資攻擊前因馬隊不能再調諭令毛昶熙招募馬勇該大臣見於每寨中派選一人一騎

輕而易舉並於投效之人責令寨長保送約歸陳兩屬中可得馬
隊三四百名辦理尙屬妥協惟賊勢剽疾異常恐見集馬隊尙不
敷攻剿著於歸陳兩屬之外再行設法選派馬勇務期多多益善
俾成大隊庶可隨賊所向馳往攻擊另片奏辦理招撫捻首事宜
等語孫葵心在六安境內既爲該逆等拘囚投誠之意自必更堅
正宜乘此機會迅速入手以免致滋他變賈臻業已調任安徽著
卽飭令該藩司設法辦理毋再遲延將此由六百里諭令知之○
是月緩徵直隸滄州等三十九州縣被災村莊新舊額賦山東臨
清等四十八州縣並德州等四衛被災莊屯本年額賦蠲緩江蘇
高郵等二十一州縣被擾地方新舊額賦川沙等三十三廳州縣
並淮安楊州等五衛歉收被災地方新舊額賦貸山西薩拉齊等
九廳縣被災倉穀展緩臨汾洪洞二縣歉收村莊新舊額賦

二月己未朔諭內閣徐之銘奏回匪襲踞晉甯州城旋即克復並
江川甯州等處解圍一摺上年十一月間雲南迤西回匪分股襲
踞晉甯州城經知州熊夢昌等調集練勇分隊進攻外委李和首
先登城外委蔣連璧等先經改裝進城放火接應兵勇乘勢齊登
斃賊數百名逃出之賊復經兵練截殺五六百名奪獲槍礮器械
無算立將州城克復另股匪首馬勇卽馬雙恩攻撲江川縣城署
知州訥謨謹等分路剿擊武生周鈞等殺賊三四百名武生李必
湯矛截馬勇斃命賊始紛紛敗潰出城追殺三十餘里其攻撲甯
州之賊經知州文廷銑等分督兵練竭力守禦並乘夜圍攻賊營
槍礮齊施斃賊無算復追殺十餘里賊屍徧野江川甯州兩屬均
已一律肅清剿辦尙屬出力在事出力員弁著徐之銘擇尤保奏
候朕施恩○諭軍機大臣等徐之銘上年十月間奏請令張亮基

在任調理摺內有七月二十四日護提督褚克昌陣亡之語未見專摺奏報是否摺件遺失著該撫查明該總兵陣亡情形詳細具奏其回務副掌教徐元吉武生馬如龍前據該撫奏請令其辦理應撫事宜此次賊踞呈貢經總兵何自清督兵剿擊克復縣城詳細情形摺內亦未據聲敘至楚雄府城被陷時迤西道宋延春如何回省有無逃避情事均著徐之銘確切查明據實詳晰具奏將此由六百里諭令知之○予雲南陣亡典史羅宗洲祭葬世職○辛酉僧格林沁西凌阿國瑞奏查馬隊見有三千餘名臣等選帶二千餘名於正月二十七日行抵太義集途次接據探報捻匪分三股先後闖入東境定陶曹縣荷澤等縣地方往來無定臣等詢之大義集及附近各村團長則稱賊勢甚眾鄉團膽怯不能協助迎剿卽各守村寨尙不知能否保全等語臣等查係實在情形萬

難勉強卽於二十七日仍回唐家口激勵官兵防守河岸至馬步官兵潰散之餘喘息未定銳氣未復欲抵此十餘萬方張之寇強弱懸殊難望得手惟有養精蓄銳裁汰疲乏以圖再舉其陝甘官兵不堪驅策者約二千餘名擬卽遣撤回伍一面咨商袁甲三迅卽撥兵會同田在田伊興額實力截擊以便牽制擒匪後路俟牛頭河及運河防守布置嚴密後如有可乘之機再行督兵剿辦上諭軍機大臣等此股擒匪旣號稱十餘萬兇悍異常各屬鄉團未能協助官兵但各守村寨必須互相聯絡方能杜賊竄撲該大臣等仍當激勵趙康侯等令其分防鄉團遇賊卽擊毋令賊蹤北竄見在裁汰陝甘官兵二千餘名兵力更單惟有將牛頭河及運河等處各要隘嚴密防守以固北路藩籬俟袁甲三會同田在田伊興額等分兵剿辦將擒匪後路牽制該大臣再當酌度機宜

兵策應此時宜仍遵前旨不可銳意輕進再蹈從前覆轍將此由六百里諭令知之○諭前因綿性奏變通私徵改充公用一招復據奏派令回子郡王愛瑪特查明戶口並有伯克勒索錢文情弊等語先後諭令常清等嚴密訪查並將變通私徵有無流弊之處迅速據實具奏本日據英蘊奏參綿性私設鹽課並未與各城商辦於上年三月開徵每月每人收普爾錢二文三品伯克至七品伯克按品級每月交錢五十文三十文不等收至三四箇月停止並向安集延外夷每月挨名收要喫飯鹽錢以致安集延夷人遞稟申訴至該大臣具奏變通私徵轉爲公用應俟奉旨允准再爲舉行輒卽咨調已革阿奇木伯克阿密特並擅畱愛瑪特辦理清查戶口事件等語綿性私設鹽課並向安集延外夷一律徵收似此任性妄爲深恐激變地方著常清景廉查明綿性所收錢文若

干作何用項並查明愛瑪特如有勒索回眾情事卽一併據實參奏毋稍徇隱將此諭令知之○予貴州陣亡副將善寶等祭葬世職○都興阿奏正月初旬天長髮逆勾結捻匪陳自明直撲金溝當派守備陳浚家等各帶礮船分路進攻詎該逆在南宮廟搭造浮橋搶過北岸由旱路繞至塔兒集等處我軍登岸迎剿連日斬馘頗多初十日賊眾由金溝西岸突出三千餘人官兵佯爲撤動誘其離巢返戈回擊殲斃亦復不少遂密飭各隊四處設伏當將浮橋焚燬我軍搶過西岸盡力追殺約斃賊二千餘人餘賊向天長一帶分路竄逸十六七等日該逆約有三千餘人突至大儀集等處聲言直撲瓜揚另股賊馬圖竄邵伯經參領海全派令委參領富升等各帶馬步隊行抵大儀地方該逆列陣迎拒富升等帶領馬隊直前衝擊李有才等分左右兩路前進孫文友擣其中堅

逆勢不支追殺十餘里斃賊甚多當卽收隊回營至江陰黃田港有賊船數百隻新溝有長龍賊船八十餘號日在君山演礮並在常州辦船計圖北竄下游江靖一帶水路防務喫重見添派參將刁經明酌帶礮划馳赴下游會同原泊師船妥爲布置並令總兵吳全美調撥快礮船刻日下駛一體防禦以固江北藩籬報聞

○楊載福奏上年十一月二十二日首逆陳玉城率眾萬餘來攻樅陽以圖進援安慶經總兵李成謀督同遊擊韋志俊飭令各營靜鎮固守賊卽踞於附近之七里亭地方韋志俊在樅陽街頭築立一卡力扼要衝李成謀分派三板船拖入蓮花池內護衛營卡二十四日賊眾在下樅陽河岸攻撲水營時水落岸高師船礮施無準李成謀飭勇在羅塘洲安礮對岸轟擊斃賊多名賊乃分股於隄內掘壩欲洩蓮花池水使師船不得停泊以圖便於攻卡副

將左光培於洲上添排大礮李成謀並調集擡槍齊向隄內轟擊
韋志俊亦派隊由陸路出攻掘壩之賊始退當於該處築卡扼守
二十五日該逆全力攻上樅陽街卡韋志俊督飭伊昌景等營極
力守禦臣慮韋志俊兵力太單卽於是日帶參將陳代友等率正
左正右兩營策應該逆忽退踞官埠橋意在別尋路徑查樅陽小
河溯流而上約百餘里可通安慶之路甚多臣隨於二十八日督
率師船擇要設防以斷該逆暗渡擾皖之路賊見無隙可乘由官
埠橋復竄樅陽占踞附近各山築壘多座連日出隊爭撲均經官
軍擊退正月初一日賊又分數股襲樅陽上下各卡我軍豫爲設
備賊不得逞遂於初三日仍退往官埠橋盤踞我軍卽將附近賊
壘概行鏟平惟官埠橋距樅陽僅二十餘里難保不復來窺伺臣
仍督飭各軍認真堵禦以免疏虞報聞○壬戌以捐輸軍餉永廣

江西鄉試中額一名南昌府學額五名武甯六名○癸亥諭軍機大臣等毛昶熙奏擒匪出巢四竄請會合鄰省馬隊痛加剿洗一摺據稱擒匪自甯陵解圍後退至該縣迤北有沿隄東竄之勢前竄東境之擒由曹考西趨蘭儀邊境意在勾連前股西犯復潛繞夏邑東北一路經官兵跟追已向東南遁去白旗擒股竄向柘城一路攻撲縣城劉狗等擒時在沿邊一帶往來游駛聲言欲撲歸德郡城因蒙亳一帶米糧缺乏是以傾巢而出若四面截擊實可削平惟存營馬隊太單不敷防剿請飭德楞額伊興額督帶馬隊來豫會剿等語擒眾傾巢出竄如能厚集兵力痛加剿洗較之圍攻擒圩自易爲力惟見在賊匪擾及東境北路正當喫緊著僧格林沁等斟酌情形如德楞額伊興額可以帶隊前往卽飭赴豫省會同毛昶熙之軍合力剿辦儻嶧縣及徐州一帶地方防剿緊要

卽令該副都統等確探賊蹤分投迎擊與豫省官軍互相援應亦不得株守一隅致誤事機將此由六百里加緊諭令知之○辦理四川軍務湖南巡撫駱秉章奏啟程赴川日期得旨初抵川境卽將川省軍務並經過地方情形馳奏○甲子袁甲三奏捻逆結夥北犯臣本擬將皖事布置周妥卽押帶精銳進駐徐州與僧格林沁會合夾擊乃團練構釁壽城擅殺一案臣添委臬司張學醇赴壽會同廬鳳道才宇和查辦尙未接據稟報而苗沛霖又以缺糧爲詞糾約宿州小黃旗等練赴東路泗靈打糧枝節橫生遠近震駭當卽分別函札剴切勸諭飭令撤回一面派撥兵勇飭委總兵張得勝等帶赴固鎮相機遏截並飛屬總兵滕家勝由徐宿趕赴泗靈聯絡民圩以資鎮攝如果卽日撤回尙可設法駕馭儻竟不服彈壓不得不以兵力鉗制又據蒙城官紳稟稱苗沛霖前調策

練有圍攻壽城之說該練董等激動公憤將其城內所設公局辦事親信之人搜殺數名餘俱逐令出城一切稟命於官不受苗練脅制人心奮發深明大義與壽城之擅殺不同但恐民志未能堅定該練或又乘機報復則軍務尙未定局兵勇驟難分撥臣惟有體察練情相機酌辦儻稍有定局卽當派撥勁旅速赴徐宿與田在田伊興額等會合兜剿先以牽制捻逆後路一俟李續宜到任會商布置臣卽統兵北去與僧格林沁互相策應力埽捻氛以固北路藩籬翁同書奏竊臣欽奉諭旨特召回京伏念臣從軍將及十年尙未得瞻仰天顏臣父母年逾七旬亦久違定省茲得解職回京竊符私願惟查苗營水陸隊伍直逼兩河口圖撲參將鄭昌林營盤各鎮將紛紛稟請出隊臣以苗練攻城此時意主撫綏不得不爲之隱諱儻我軍出隊勢必爲所藉口因嚴禁出隊止令

水師礮船巡守而兩河口一經紮營壽州卽不可保臣一面督令登陣守禦一面飛咨袁甲三妥籌兼顧袁甲三以臣爲穎壽人心所繫函屬少畱惟臣性情耿直於互爭一案未能調和久畱誠恐無益見在孫家泰業經參革徐立壯亦已遠移擬俟苗營宿忿稍平孤城可保卽遣人齎送關防交新任撫臣李續宜接收臣卽日啟程回京儻攻城日急臣惟有始終守護以死殉之斷不敢取巧苟全飄然遠引置國土民生於不顧又奏正月二十四日下蔡大隊數千到兩河口與黃鳴鐸水師鏖戰竟日次日過淮由八公山後分兩路直臨城下徑撲北關殺傷民人數名旋撲兩河口參將鄭昌林營盤臣聞警卽督兵登北門守禦見下蔡馬步隊撲營不能逞志卽以大隊分撲北關集總兵尹善廷帶勇過河截剿副將黃鳴鐸督帶水師礮船往來衝擊相持三時之久彼見我軍添調

隊伍始行撤回而兩河口礮船被下蔡礮船圍攻傷勇多名其隊
已由菱角崙過河正陽萬分喫緊查臨淮道路久已不通袁甲三
萬難兼顧儻正陽失利則壽州在罝網之中不特臣回京無期卽
摺報亦無路可達請旨飭令新任撫臣李續宜迅率勁旅星夜來
壽庶危城尙可保全又奏張學醇已至下蔡而苗沛霖亦到下蔡
該司與苗沛霖素尙相得當可排難解紛又查臣奉旨進京呼應
不靈所有潁壽六安軍務在李續宜未到之前必應由袁甲三安
籌兼顧張學醇久在袁營帶勇可與慶瑞黃鳴鐸等妥籌商辦臣
卽可諏期啟程又見辦壽州糧臺之安慶府知府蔣錫綬廉潔樸
誠原係賢員但理財非其所長亦不足以鎮壓兵勇張學醇向帶
兵勇素得軍心以之辦理糧臺必能得力似可飭令張學醇辦理
壽州糧臺以重事權而期允洽再四川重慶鎮總兵尹善廷所帶

官兵既經裁撤該總兵無兵可帶似無庸虛畱此閒該員忠勇樸誠智慮深遠爲鎮將中不可多得之員見在川東喫緊楚師後路堪虞該員蒙簡放重慶鎮員缺請卽飭赴本任必能聯絡軍民力圖整頓於川省軍務實有裨益 上諭軍機大臣等下蔡苗練馬步隊已由兩河口攻撲壽州北關傷我兵勇並由菱角嘴過河正陽喫緊壽城危急該練種種狂悖實堪髮指袁甲三此時正當嚴扼臨淮未可遽行移兵徐宿著卽密商翁同書如張學醇與苗沛霖素稱相得可以消其反側見在已至下蔡卽責成該臬司向其曉諭予以自新儻能早知悔罪約束部眾聽候查辦尙可曲從寬宥若藉尋仇爲名肆行狂悖叛逆顯然卽當密速定計設法誘擒以除地方之害蒙宿人心旣不爲其所用正可乘勢解散黨與令其縛獻首逆切不可養癰貽患致令不可收拾翁同書此時爲穎

壽人心所繫惟當嚴密布置力保危城不可意存推諉俟李績宜到任後再行交卸署阜陽縣知縣葉春培勦撫捻圩既有威名苗沛霖輒欲將該員撤任其意何居翁同書不允所請自是正辦張學醇久在軍營素得兵心卽著辦理壽州糧臺以專責成蔣錫綬卽毋庸辦理重慶鎮總兵尹善廷見在帶勇截勦苗練正當喫緊之際著仍畱皖省毋庸前赴四川本任苗練糾約宿州小黃旗等練赴泗霍打糧袁甲三已令滕家勝前往鎮攝著卽飭令該總兵聯絡民圩相機辦理將此由六百里加緊各密諭知之○翁同書奏准河南巡撫嚴樹森咨開據署光州知州張席珍稟稱苗練前派委員候補縣丞王則儔劉良田並新投誠之潘四赴固始縣三河尖地方築立圍寨又在固始東北一帶邀集練總湯林川等十三團寨悉令歸從無須完糧並查得苗練在三河尖及固始往流

集地方設立釐卡並聞欲於光屬派糧萬石等情此後催科政務
恐爲掣肘請卽查禁臣查苗練勒捐設卡乃其慣技袁甲三之銀
米尙被掠去此事豈能查禁但河南係京師屏蔽可否飭令河南
省自固疆圍免致滋蔓難圖 上諭本日據翁同書奏嚴樹森咨
稱苗練派人在固始縣三河尖地方築立圍寨又在固始東北一
帶邀集練總湯林川等十三團寨悉令歸從又於三河尖往流集
等處設卡抽釐並欲於光屬派糧萬石咨請查禁等語苗練與壽
州團練尋仇滋釁疊據袁甲三翁同書奏報種種不法實堪痛恨
見復於固始等處邀集團寨悉令歸從不完糧賦並設立釐卡苛
派糧石其勢已擾及豫省翁同書不能查禁亦屬實在情形著毛
昶熙嚴樹森卽曉諭各處紳團各安本業照舊完糧毋得爲其誘
脅其三河尖往流集等處亦不准畱苗練設立私卡致貽後患將

此由六百里各諭令知之○諭王履謙奏浙江團練捐輸事無專責請旨遵行一摺據稱自邵燦撤去團練大臣以後前調紳士謝敬邵清益等所部鄉勇防守蕭山等處見在無所稟承地方官辦理勸捐有煙鏹鹽斤醬缸等捐名目房捐自三間以上每月每間輸錢五十文暨一二百文不等事涉煩苛挨戶徵索斂怨必深等語浙西一帶賊氛充斥浙東防務正形喫重所有謝敬等所募鄉勇卽著聽候該撫及王履謙調度至地方官勸辦捐輸固宜認真辦理亦不可過事煩苛致失民心如有不肖官吏多立名目侵漁肥亡者卽著該撫查明參奏並飭地方官關會王履謙妥爲辦理不可兩歧另片奏甯紹地方饒瘠各殊浙東捐貲難濟浙西並義橋防勇單弱各等語浙西浙東防務均關緊要軍餉一項全在分別緩急通融勻撥豈可稍分畛域如浙東情形稍緩餉項有餘仍

當分解省垣濟餉不得專歸本處地方支用至逆匪由新城一帶竄擾富陽與諸暨蕭山等處僅隔一江謝敬所帶姚勇屯紮義橋爲數僅五百名不敷堵禦自係實在情形著王有齡趕緊添派兵勇以資防剿毋令完善之區致遭蹂躪並著王履謙督練嚴防不准推諉將此由六百里各諭令知之○袁甲三奏幫辦軍務鑲黃旗蒙古都統穆騰阿傷疾舉發咨請開缺得旨著回京當差○翁同書奏招撫孫葵心一事疊奉諭旨責成臣相機酌辦臣飭程鉅等密圖撫馭業已布置妥貼乃程鉅馳抵該處而孫葵心先期三日出巢由河南陳汝光固而入霍邱六安等境內其眾數萬遂與粵逆陳玉城捻逆龔得會於壽州之南尋踞合肥小蜀山四出焚掠彼時業已大股出巢勢難議撫擬俟其回巢再理前說臣知孫葵心逆眾乏食窮困恐其四竄疊飭壽六各軍嚴防而令兵練會

同堵禦屢得勝仗未容闌入本年正月廬江練勇堵剿獲勝擊倒賊轎倏忽擁護而去探聞坐轎之賊卽係孫葵心業已因傷身死如果該逆首已伏冥誅則穎毫之間銷一巨寇儻孫逆尙存則回巢之後可期決意投降新任藩司賈臻才具開展無論肫誠必能招撫妥協但孫逆之黨尙有姜台凌一股而北路劉添幅一股尤爲悍鷲素無降志非殲除此股則捻患終未能平報聞○命在籍左副都御史王履謙幫辦浙江團練並勸捐事宜○賞六品頂帶德興阿三品頂帶署密雲縣副都統○丙寅諭內閣戶部奏試辦昌平州黑地升科請派員查辦並涿州民人史長春等呈請補領執照應一併查勘等語著派陳孚恩寶鋆會同張祥河董醇認真查辦以昭覈實其自咸豐四年以後順天直隸所屬州縣辦過升科地畝一千數百頃歷年課銀是否該州縣按額徵收並未專案

報部著直隸總督順天府尹立限半年將前次欠解銀兩之各該州縣詳細查明嚴行追繳埽數解部如有侵蝕情弊卽據實參奏○諭軍機大臣等本日據嚴樹森奏擒匪竄逼省城見在力籌堵禦一摺皖省大股捻匪麇聚甯陵圍攻縣城擊退後又欲會合西竄見在圍攻通許縣城並分兩股一股圍攻縣東之王固一股攻撲縣東北之盧氏並擾及朱仙鎮等處距省甚近賊勢蠭擁而至勢將窺伺省垣否則全股西行亦必擾及完善該撫撤去黃河南岸船隻調派兵勇分路堵遏並於省城添兵募勇布置守禦所籌尙屬周密毛昶熙見在駐軍歸德屢獲勝仗著一面派撥兵勇於柘城太康各交界處奮力截剿一面分撥精兵繞出賊前迎頭截擊毋令賊蹤擾及省垣至賊情狡譎尤恐聲東擊西以省垣牽我兵力乘隙西竄昨據聯捷奏報直隸河南濱河附近一帶捻蹤

已一律肅清是北路情形稍鬆而山陝一帶路徑紛歧尤宜嚴密扼守著毛昶熙嚴樹森飭令派出之署總兵成景於附近省城大隄內外迎剿堵其西竄其老犍坡一帶並著扼要嚴防毋稍疏懈至西南一帶團練均歸鄭元善等督辦卽著該臬司飭令官紳等統帶鄉團實力堵剿逼令回巢以免蔓延將此由六百里加緊各諭令知之○諭清盛奏佛蘭西主教江類思等赴省接見口稱伊國舊有天主堂一座在西門內熨斗隅日久被占見須交還應否另查官地抵給等語山東省城有原設天主堂地基自應給還該國惟廢址久經改造民房轉相承買各執契據勢難概令遷移除坐地業經查出應行交還外著清盛按照該國天主堂原基畝數另查官地抵給聽其修造如查無官地卽置買民地一段給予建立天主堂嗣後該省地方與各國交涉事件遇有應辦者卽奏明

辦理不得盡諉之總理衙門及通商大臣致令紛紛進京有所藉口將此由五百里諭令知之○丁卯諭內閣瑞昌王有齡奏官軍攻克江山常山兩城一摺逆匪竄陷江山常山兩縣城經總兵曾玉明派令參將林文察於上年十二月十一日督兵進攻江山分路迎剿殲斃數百名十三日復攻毀逆壘二座連日將出城拒戰之賊擊敗並擊退常山援賊二十五日官軍用火器將西山一帶賊壘十餘座盡行焚燬逆眾逃竄立將江山縣城收復已革提督張玉良統帶全師進攻常山已革總兵李定太乘夜分路進攻將後路三里灘賊營焚燬前路陳村口之賊亦驚亂狂奔官軍乘勢追至城下賊眾驚惶突門而出遂於正月初三日將常山縣克復追殺二十餘里沿途斬擒甚多勦辦尙爲得手出力文武員弁兵勇著瑞昌王有齡擇尤保奏候朕施恩毋許冒濫○諭前因邵輝

等奏請令已革臬司段光清統帶艇師剿匪當經降旨將該員暫緩拏問茲據瑞昌王有齡奏官軍進攻江山常山縣城該革員督率團練協同攻剿迅克兩城尙知愧奮段光清著免其拏問仍責令帶勇剿賊以觀後效○瑞昌王有齡奏已革道員李元度由浙江溫處道調補安徽甯池太廣道莅任數日因徽州失守奏參奉旨革職拏問該革員失守城池自屬咎有應得惟查浙省逆氛正熾處處用兵該革員謀勇素優臣等先令招募勁旅數千名以補浙軍之不足儻能親帶前來會同剿辦尤爲得力可否飭下曾國藩仍令李元度赴浙差遣責令立功自贖之處恭候 欽定

上諭已革徽甯池太廣道李元度著曾國藩飭令前赴浙江交瑞昌王有齡差遣委用其應得失守罪名仍著曾國藩查辦○以浙江軍情緊急命新任布政使林福祥酌帶兵勇剋日赴任○以攻

克江山常山二縣城復已革提督張玉良等職餘加銜升敘有差
○戊辰諭內閣前經降旨於二月十三日回鑾見在朕躬偶抱微
疴著改於二月二十五日啟鑾三月初二日還宮十二日由京啟
鑾祇謁東陵禮成後駐蹕避暑山莊○己巳袁甲三奏苗練由
菱角背渡淮立營馬步數十直向壽南竄擾已襲踞堰口集民圩
欲攻正陽翁同書咨臣發兵撥餉前往援救柰臣營數月無餉未
能分撥啟程且苗練另股萬餘人赴靈璧打糧其意在兜截臣營
後路臣前派總兵張得勝帶兵前往並會同泗州靈璧各牧令調
團遏截雖該練怵於兵威自行撤退而能否相安無事尙難豫定
臨淮爲南北鎖鑰關繫皖北安危不能不分別布置鎮靜以待見
在上游河路梗阻以臣之餉絀兵飢實難兼顧壽州除咨覆翁同
書就見有兵力嚴密防剿外一面飛飭張學醇等再行勸諭苗沛

霖速將練眾撤回但其勢已成燎原其心實爲叵測誠恐藉事生
波不特壽穎可危卽豫省光固亦虞震動翁同書係奉旨回京之
員帶病守禦儘力撐持其壽城以上亦恐難以兼籌李續宜本駐
桐城相距不遠應請旨飭令迅速到任督辦防剿並請飭下河南
撫臣飛飭光固等州縣嚴密防範毋任闖入滋擾臣俟協餉解到
應如何分兵再行妥籌辦理 上諭軍機大臣等苗練兇橫不法
叛迹昭然此時尙欲遷就羈縻恐該練勾結粵匪捻匪聯爲一氣
剿辦更難措手臨淮爲南北鎖鑰見在上游河路已梗亟應趕緊
布置毋稍疏虞翁同書之兵僅一萬餘名尙恐不敷堵剿該大臣
督辦皖省軍務責無旁貸仍當與翁同書密商定計撥兵夾擊迅
速殲除苗沛霖旣爲眾心所不附卽可設法解散黨與令其縛獻
首逆或不動聲色設計誘擒剿除巨寇惟在該大臣相機速辦不

可徒事羈縻以致養癰貽患將此由六百里諭令知之○諭前因安徽壽州緊急諭令李績宜趕緊赴任本日復據袁甲三奏苗練攻圍壽城翁同書力疾固守經該大臣派令張學醇趕赴下蔡勸諭苗沛霖毋許妄動雖將撲城之練暫時撤退而次日仍由菱角觜渡淮直向壽南竄擾並有欲攻正陽之說該大臣因臨淮緊要未能分兵前往請飭令李績宜迅速到任督辦防剿等語苗沛霖叛逆昭著實屬孽由自取若不及早殲除恐成燎原之勢著李績宜卽將桐城防剿事宜妥爲布置一面酌帶所部兵勇馳赴壽州殲厥渠魁解散練眾迅解城圍毋稍延緩將此由六百里諭令知之○諭慶端瑞瓚奏武弁縱匪在洋劫擄分贓探聞潛回廣東請飭查拏等語匪首王文廣卽王瑞以廣東勇首迭次保舉洊升都司並賞戴藍翎乃不思立功報效輒敢置造艇船假名貿易護商

縱令匪黨在洋劫擄坐地分贓上年夏間在蘭臺地方開礮逞兇
經度端等委令副將吳鴻源出洋剿捕復敢糾集廣艇勾通粵夷
突入海口滋擾見又潛回廣東香港地方糾結匪類意圖報復實
屬罪大惡極王文廣著卽斥革拔去藍翎著勞崇光耆齡嚴飭地
方文武密速查拏務期弋獲就地正法以絕根株勿任漏網將此
由五百里諭令知之○庚午曾國藩奏祁門西北兩路嶺隘紛歧
西路之大赤嶺北路之大洪嶺尤爲扼要臣派副將唐義訓在大
赤嶺修築柵卡撥祁門老營更番戍守大洪嶺係提臣江長貴駐
紮扼守正月初六日連接探報石埭大股賊匪同日分犯二嶺大
洪嶺一股經江長貴派兵援應該逆退伏嶺腳大赤嶺一股已竄
至厯口當派副將唐義訓統領各營馳往迎剿見白旗賊匪約二
千餘人擁至石門橋外田隴分股猛撲唐義訓飭各營分路設伏

親督兵勇由中路進擊該逆抗拒戰約半時伏兵齊起包出賊後
礮斃騎賊一名殺悍賊數十名唐義訓乘勢揮令猛進該逆且退
且拒各軍追殺賊屍縱橫拋棄旗幟槍械無算初九日唐義訓率
各軍過嶺仍分路並進賊驚潰走我軍追剿直出赤嶺之外計斃
賊千餘名生擒一百三十五名陣斬賊首麟天豫古得金查此股
逆匪卽去年十一月內撲犯羊棧嶺竄踞盧村之賊經我軍大加
懲創復敢直犯祁門意欲攻我不備計殊狡毒此次擒斬渠魁賊
之器械拋棄殆盡所有出力將士籲懇 天恩併入建德案內請
獎 上諭內閣石埭大股賊匪分犯大赤大洪二嶺江長貴督隊
將大洪嶺之賊擊退大赤嶺之賊已入厯口副將唐義訓等馳往
迎剿計共斃賊千餘名生擒一百三十五名陣斬賊首麟天豫古
得金剿辦尙爲得手所有在事出力將士著准其併入克復建德

案內由曾國藩奏請獎勵○曾國藩奏逆賊黃汶金大股由饒州連陷江西數縣竄近景德鎮之規田街左宗棠一軍卽由婺源回駐景德於鎮後馬鞍山一帶修築營壘並飭團練於鎮上之里市渡趕造浮橋十一月十二日派道員王開化等帶兵過河至羅家橋洪源等處遇賊接仗轟斃騎馬賊數名賊始卻退探報賊之大隊已逼浮梁縣城隨飭各營循河岸繞出截擊賊伏不出而伺官軍收隊後竄陷浮梁縣城十三日令各營出隊進攻浮梁之賊該逆乘虛分撲黑市渡及西瓜洲均經我軍擊退浮梁之賊亦卽遁去次日賊復由里市渡等處過河排陣遊擊羅近秋等分出衝擊賊猶抵死拒敵我軍復左右包鈔賊始驚潰狂奔我軍泅水追殺立斃悍賊百餘名生擒數十名溺斃無算其對岸之賊復揮中渡以下數股擁至河邊輪放槍礮我軍亦分三層排列隔水轟擊賊

悉竄回洗馬橋珠田界牌等處此賊匪初次至景德鎮我軍擊退及收復浮梁縣城之情形也二十三日洗馬橋之賊回竄羅家橋龍頭山一帶經我軍擊退賊目黃汶金率黨二萬餘分五路來犯均爲我軍力勦賊眾披靡傷斃多名賊目李遠繼先以千餘人向葉家洲牽掣我師而大隊在上流高家灘過河由陽湖街大路直趨景德鎮我軍三面圍攻該逆大敗返奔我軍乘勝揮擊斃賊數百名墮水死者不計其數其另股賊匪攻浮梁縣城者兩次均經我軍擊退並陣斬僞指揮三名是時總兵鮑超由祁門回援景德鎮前隊已到賊相率遁歸楓田街曹家渡等處此黃汶金大股續犯景德鎮官兵憑河堅守之情形也嗣左宗棠進扼梅源橋鮑超進扼洋塘該逆復從下游添集賊黨麇聚於洋塘對岸之雞公坡並由謝家灘泥灣街一帶層層築壘聯絡二十餘里時圖潛撲鮑超

營壘左宗棠派遊擊羅近秋等排營雞公坡河邊以護鮑超老營並派桂勇楚右營列隊洋塘左邊以防該逆由童家灘鈔襲之路鮑超自率所部由洋塘山左前進一意專擊下游之賊詎該逆乘夜修搭浮橋渡河而南徑襲官軍營盤經我軍痛勦賊始敗退遂乘勝三路並進該逆亦三路迎拒鏖戰二時之久賊勢不支鮑超督飭各營猛擊直抵浮橋殺斃悍賊二千餘名該逆奪橋而走懼官軍追勦立將浮橋砍斷鮑超督軍由淺灘分途過河圍殺賊屍山積內有黃袍及紅袍賊目十餘名駢死其中乘勢將謝家灘一帶賊壘全行踏平該逆後隊山岡之賊又層層來援我軍愈戰愈奮將賊衝爲數段該逆狼奔不顧計斃賊四千餘人溺斃逃散者不可勝數逆首林侍發許茂才死於亂軍黃汶金身受重傷該逆見分兩路一由建德回竄青陽一歸併彭澤另股鮑超等分兵跟

蹤追剿以靖西路左宗棠仍回駐景德鎮稍休兵力以防東路此
洋塘獲勝之情形也查逆首黃汶金爲著名悍賊自去年十一月
撲陷建德蔓延鄱陽浮梁等縣其時臣在祁門三面皆賊僅畱景
德鎮一綫之路以通接濟該逆盡銳攻撲欲得甘心賴左宗棠之
謀鮑超之勇用能大挫兇鋒化險爲夷洵足寒賊膽而快人心所
有出力員弁可否併入前案彙保出自鴻施 上諭此次逆匪率
黨攻撲景德鎮經左宗棠鮑超督兵奮擊大挫兇鋒勦辦尙爲得
手所有出力員弁著曾國藩彙案保奏候朕施恩○諭軍機大臣
等本日據清盛奏捻逆渡河北竄派兵截剿一摺竄擾山東捻逆
各股先在曹縣等處地方盤踞由壽張縣境擾及東平州屬之戴
家廟南岸鳧水渡河其大股並自安山渡河竄至東平迤西窪裏
地方並有圖竄長山縣周村之語此次捻逆蠶擁而至人數眾多

見已渡過連河步步北犯亟應設法剿除以免延蔓清盛見已移調濟東泰武臨道明新等將所帶登中等營官兵一千名前往防剿著卽飭令該道實力剿洗一面嚴飭各州縣率領民團協同堵禦以遏北竄之路各該處距省較近所有省城守禦事宜並著清盛妥爲布置如果賊情緊急清盛卽當帶兵出省力挫兇鋒不可株守省城致有貽誤僧格林沁等駐紮唐家口德楞額駐軍嶧縣見在賊已繞越西北在該大臣等軍營之後清盛所派兵力尙單深恐不敷剿辦著僧格林沁等迅卽派撥精兵招集團練繞出賊前會同該署撫派出之兵迎頭截剿務須逼賊回巢勿令北竄將此由六百里加緊各諭令知之○諭春佑奏朝陽縣盜匪滋擾派兵剿辦一摺據稱朝陽縣賊首劉猪李鳳塗等糾集多人經該縣知縣富昌帶領兵勇親往捕拏槍傷賊匪二十餘人殺死五人生

擒四人餘匪逃竄二月初四日該匪劉猪等復糾黨六七百人分
路進街放火焚燒劫放監犯三百餘名並將縣署看押人犯二百
餘名劈門放出該縣及丁役人等均各受傷三座塔稅員衙門庫
銀亦被搶劫見在占踞街市勢甚猖獗春佑已派兵五百名往剿
並請將僧格林沁所調哲里木官兵五百名暫畱協剿一面飛咨
盛京派兵堵緝逆匪劉猪等係奉天已獲盜首王達餘黨膽敢糾
眾劫囚焚燒衙署搶劫稅銀實屬罪大惡極亟應一鼓剿除春佑
所籌尙妥著卽飭令熱河道福厚協領尙那布督率參將松年等
將該匪悉數殲除盡法懲辦並著玉明倭仁景霖趕緊派兵合力
夾擊一體兜拏毋任一名漏網哲里木官兵五百名著准其暫行
截畱俟剿辦事竣仍飭速赴僧格林沁軍營以資調遣該縣文武
下落並貽誤情形及倉庫被劫銀兩監犯實數均著春佑查明具

奏將此由五百里各諭令知之○諭前因擒匪竄近河南省城並
有乘隙西竄之意諭令毛昶熙嚴樹森嚴密扼守要隘堵其西竄
本日據勝保奏接據探報擒匪馬賊由北路突入朱仙鎮盤踞其
大股已至蘆花岡省城南門曹門宋門均已屯閉二月初一日朱
仙鎮蘆花岡之賊均向省西之中牟新鄭等縣及老河口地方竄
逸因而西門亦閉等語前據毛昶熙奏官軍分路迎擊擒匪九戰
皆捷已派署總兵成景等由甯江一路鈔追見在賊逼省城勢更
猖獗著卽督飭帶兵各員奮力追擊儘遷延不追卽查明嚴參至
中牟新鄭爲山陝門戶見在賊蹤逼近難保不乘間西竄窺伺山
陝邊境及完善之區譚廷襄已派兵在潼關商雒等處設防本日復
諭令常績撥兵嚴防澤潞一帶著毛昶熙嚴樹森仍遵前旨分派
兵勇迎頭截擊痛加剿洗逼令回巢並將西路要隘嚴密扼堵如

賊勢西趨卽會同山陝防兵合力勦擊毋令蔓延將此由六百里加緊各諭令知之○諭有人奏擒匪竄擾豫東情形一摺據稱上年九月十二日及本年正月擒匪疊次出巢滋擾俱由蒙亳取道歸德虞城竄入東境兵勇並未出城截勦大股回竄僅止截殺零星後尾並有捐納員外郎梁琛在營用事虛冒勇糧分肥入己以佃勇四百人捏報三千人等語擒匪疊次由歸德竄越毛昶熙駐紮該處何以未經堵截所奏勝仗是否捏報著嚴樹森查明據實具奏員外郎梁琛虛冒勇糧是否屬實並著該撫確切查明毋稍徇隱將此諭令知之○曾國藩奏祁門以西係僞主將黃汶金大股見退下隅阪尙力拒鮑超一軍相持未決祁門之東係僞忠王李秀成大股見竄鉛山之吳坊等處有人擾江西腹地之意距臣祁門老營相去六百里外兵力實難兼顧臣已飛咨江西撫臣飭

劉于潛堅守撫州府城飭黃鳴珂堅守建昌府城並飛調魏喻義一軍駐紮江西省城豫爲籌防或可保全無虞報聞○轉慶英爲

兵部左侍郎以勝保爲兵部右侍郎

候補侍郎

○辛未諭內閣喬松年

江清驥奏請將水師軍餉暨江面抽釐統歸江南糧臺經理一摺著照所請所有移設泗源清釐局著改歸江南糧臺由江清驥經理其吳全美李德麟所帶續添礮划船餉並著彙入江南各項水師一體由南臺開支以專責成○壬申諭內閣瑞昌王有齡奏官軍克復富陽縣城一摺上年十二月間皖匪自桐廬等處竄踞富陽意圖東竄經副將貴廷芳等督帶兵團水陸夾擊於二十三二十五等日疊次鏖戰擒斬甚多二十八九等日該逆緊守城卡復竄竹箴出犯經我軍奮力攻擊賊不能支我軍追至城下轟斃賊目二名步賊數十名本年正月初三四等日官軍水陸並進各

礮船沿城攻打又斃賊數十名其出戰之賊復經兵團槍礮齊施
斃不可勝計初七日我軍四面環攻自辰至酉鏖戰竟日將西
門賊營踏燬斃賊無算是夜守備包文舉布良帶等潛伏東西兩
門舉火爲號貴廷芳等督率各路兵勇奮力攻城知縣蔣貴斌等
督團助剿該逆猝不及防均向北門紛紛逃竄我軍斬關直入斃
賊甚多當將富陽縣城克復追剿四十餘里砍獲首級器械旗幟
無數辦理尙爲得手在事出力員弁兵練著准俟富桐一律肅清
彙案擇尤保奏署富陽縣知縣蔣貴斌集團助戰克復城池著改
爲革職畱任典史張椿應得失守處分著免其置議○翁同書奏
探聞苗沛霖盤踞堰口集後親自帶隊南行據張學醇稟稱伊在
下蔡再四勸阻不聽張學醇由下蔡徑赴正陽並未來壽審案見
在壽城西面路絕僅有正陽一綫可通幸城枕淮淝阻水爲固故

得城門不闔市肆不驚

臣

畫出南關撫慰飢軍夜在城上循陴督

守不敢藉病偷安惟兵勇待哺嗷嗷朝不謀夕但使餉道不絕粵

逆不至尙可保守危城至徐立壯與苗沛霖皆住鳳臺蒙城之間

相去二十里咸豐八年苗沛霖心懷忌嫉以計殺徐立壯之黨練

總鄧兆元由是徐立壯離心至十年秋冬閒苗沛霖誅鋤徐姓族

屬兩家構釁始深苗徐之練俱不聽官鈐轄而徐練略知體制

臣

以徐立壯紮營城北恐與下蔡日日尋讎特令遷移遠去該練遂

在城西南魯家口紮營其地在淮河之北距正陽關不及二十里

張學醇由下蔡赴正陽以徐練與苗練不和請用兵威彈壓

臣思

苗徐不睦如蠻觸相爭官兵毋庸過問儻再讐以兵威將使兩練

皆與官兵爲讎而官兵勢成孤立萬一正陽復爲他人所據壽州

餉道旣絕城池必陷所關匪細

臣

隨卽函覆阻止飛咨袁甲三查

照並屬張學醇速來壽城審案以免案懸不結兵連不解正陽爲
一綫餉道所繫臣擬親往布置藉可駕馭徐練上諭軍機大臣
等苗沛霖於盤踞堰口集後親自帶隊南行顯係勾結髮逆以圖
一逞此時若能設法離間使該練與髮逆互相猜忌不能合而爲
一則苗沛霖進退無據勦辦似易爲力仍一面遵奉前旨解散該
練黨與令其縛獻首逆或設法誘擒剪除巨擘總宜及早圖維不
可再事遷就壽州城守尙固惟兵餉缺乏袁甲三仍當設法疏通
餉道力籌接濟俾可力保危城張學醇至下蔡勸阻苗沛霖不聽
亦應至壽州辦理練勇尋仇之案何以徑赴正陽著該大臣仍飭
令該臬司速赴壽州如果查辦平允則眾練悅服苗沛霖卽無可
煽惑至徐立壯之練雖與苗練構釁曲直是非自有公論張學醇
稟請翁同書用兵彈壓設有反側則苗練徐練皆與官軍爲敵辦

理更形棘手該大臣於此案務須秉公查辦不可稍有偏袒方爲妥善將此由六百里諭令知之○諭杜翻奏擒匪分股肆擾省垣喫重一摺據稱擒匪由定陶鉅野等處竄入鄆城擾至東平復搶渡安山運河分擾泰安等縣直撲肥城長清交界地方窺伺省城另股擾近壽張東阿一帶希圖北竄省城及張秋鎮李連橋等處均形喫重見調兵團嚴防要隘等語擒匪分擾東境勢極猖獗已據清盛奏報見在賊距省城僅百餘里清盛截畱調赴武定等屬官兵一千名改赴長清五道嶺以杜攻撲省城之路兵力甚形單弱著清盛一面督飭明新等實力防剿一面會同杜翻整飭民團調集丁勇前往長清交界協同官兵扼守並調泰安東平等處團勇分投堵禦嚴防沿河北岸仍隨時知照僧格林沁體察情形迅速分兵會同該署撫等兵勇迎頭截剿務須逼向南趨毋令賊蹤

北竄將此由六百里加緊諭令知之○諭本日據杜翻奏擒匪分股肆擾亟宜堵遏北竄並省垣喫重情形一摺擒匪闖入東境由定陶鉅野等處竄入鄆城境內擾及東平州之戴家廟並搶渡安山運河見在直撲肥城長清交界之四槐樹等處意在窺伺省城另股擒匪擾近壽張之張秋鎮東阿之李連橋一帶希圖北竄距省僅一百餘里情形十分喫重譚廷襄已投爲山東巡撫該省軍情緊要著卽星夜馳赴新任力籌防剿毋稍稽延將此由五百里諭令知之○諭昨據春佑奏朝陽縣賊首劉猪李鳳奎等糾黨六七百人分路進街放火劫放監獄三百餘名三座塔稅員衙門銀庫亦被搶劫勢甚猖獗各等語業經春佑派兵五百名前往捕拏並寄諭王明等派兵會同兜擊見在該匪占踞朝陽街市亟宜悉數殄除著烏蘭都傳諭珠勒亨迅將駐紮古北口黑龍江馬隊官

兵內挑選技藝嫺熟者一千名並盛京馬隊官兵五百名配齊軍火器械卽由珠勒亨帶赴熱河歸副都統克興阿統帶馳赴朝陽相機剿辦其餘黑龍江馬隊卽著烏蘭都認真訓練毋稍疏懈將此由五百里諭令知之○命烏里雅蘇台將軍明誼往塔爾巴哈台會同參贊大臣明緒查勘俄國地界事宜○命葉爾羌參贊大臣英蘊赴喀什噶爾會同辦事大臣奎英辦理俄國通商事宜○癸酉僧格林沁西凌阿國瑞奏臣等駐紮唐家口防守牛頭河等處正布置間接鉅野縣稟報捻匪由定陶向西北一帶奔竄行走甚急臣等卽督馬步兵勇移營南旺湖崔家橋等處以防該逆偷渡又探得捻匪竄至鄆城以東臣西凌阿督帶馬步於二月初四日行抵袁口地方駐紮該逆於是日午後由西南蠡擁而來屯聚汶河西岸經各處鄉團嚴防對岸殲賊甚多該逆拌死搶渡鄉團

潰散全股遂竄入東平汶上肆行焚擄臣等當將牛頭在防兵勇
撤回濟甯挑選精壯者統帶前進餘令畱守州城臣西凌阿督帶
馬隊由袁口馳赴汶上西北以扼北竄旋據營總富和等稟稱伊
興額等帶兵追賊於四月初七日由鉅野鄆城跟追至汶河探知
捻匪已由戴家廟等處過河復追至汶上以北之楊柳集地方與
賊接仗獲勝追殺二十餘里斃賊千餘名不料該逆大股萬餘復
行列隊抗拒環繞攻撲將伊興額滕家勝兵勇層層圍裹伊興額
奮力衝擊斃賊無算而賊勢愈聚愈眾以致伊興額滕家勝力不
能支同時陣亡等情伊興額滕家勝勦賊被戕殊堪憫惻可否仰
懇 天恩交部從優議卹以慰忠魂見在捻匪由汶上竄至甯陽
復又東竄前隊已至泗水等處前調副都統德楞額前來會剿並
令知府趙康侯募勇三千名道員李麟遇募勇一千五百名卽令

該副都統督帶跟蹤追剿臣等帶兵督後以爲策應正在啟程間探得南路捻逆五旗併出邊馬已到馬牧集以南有向正北西北竄撲之勢臣督格林沁圍瑞見擬帶領後隊暫駐汶上縣居中調度臣西凌阿見回濟甯防守州城並分派委員將運河沿隄妥爲布置勸諭鄉團嚴加防守以杜北竄上諭軍機大臣等本日據僧格林沁等奏捻匪全股東竄南捻又圖北犯並清盛奏捻匪逼近省城情形緊急見設法布置各一摺此次捻匪搶過汶河由汶上竄至甯陽復又東竄其前隊已至泗水而南路捻逆復五旗併出有向北竄撲之勢泰安一帶距省較近賊蹤見已擾及恐致震動省垣清盛已調募城守營等兵勇一千數百名分布隘口著卽督飭實力防守毋稍疏懈其前次移調之明新等兵一千名著飭令扼紮要隘痛加勦洗如果省垣情形稍鬆賊勢趨重北路清盛

仍遵奉前旨帶兵出省會同僧格林沁德楞額等軍分投埽蕩勿任蔓延此次捻眾更番竄擾東境恐該大臣等兵力不敷勦辦著德楞額迅速統率所部官兵並趙康侯李麟遇等練勇探賊所向分路追擊僧格林沁國瑞暫駐汶上居中調度西凌阿防守濟甯仍隨時體察賊勢相機勦辦總期逼賊回巢毋令長驅北犯將此由六百里加緊各諭令知之○諭據僧格林沁等奏捻匪撲過汶河伊興額滕家勝追勦陣亡東省捻勢鴟張見由甯陽泗水等處折而東趨並探聞南路捻逆復有五旗併出之說僧格林沁駐軍汶上恐兵力尙單不敷攻勦已諭令德楞額帶隊前往協勦前諭田在田於宿州布置周妥後仍回徐州見在捻匪紛竄徐州地方緊要著田在田卽與吳棠整飭團練力籌防勦探明賊蹤務須設法牽制該逆後路使不敢悉數北犯並傳諭詹啟綸星夜馳赴新

任隨同田在田等帶兵進剿毋稍遲延將此由六百里加緊諭知
田在田吳棠並傳諭詹啟綸知之○予山東陣亡總兵官滕家勝
副都統伊興額祭葬世職○乙亥諭軍機大臣等本日據毛昶熙
奏官軍不能遏賊西竄一摺捻匪自通許解圍以後逼近省垣並
延及中牟新鄭許州一帶毛昶熙已派候補道張曜統帶馬勇馳
往追剿著卽飭令會同署總兵成景等兵倍道繞出賊前會合鄉
團迎頭截擊務須逼賊回巢毋令深入河陝及渡河北竄儻任賊
長驅不能堵截致完善腹地復遭蹂躪朕惟毛昶熙是問至毛昶
熙月餉已短解至十餘萬兩據稱逐日咨催僅止零星撥解等語
見在剿賊正當喫緊之際必須兵餉充足方能激勵軍心著嚴樹
森卽督飭藩司邊浴禮將應解毛昶熙軍營月餉七萬兩迅速籌
措按月撥解其舊欠之項雖未能埽數解交亦須陸續搭解以資

接濟毋令缺乏將此由六百里各諭令知之○丙子官文奏皖捻
陳玉城由廬州舒城等處上犯經我軍擊走後因楚軍全力謀皖
省會空虛該逆勾結捻匪十數萬自霍山英山竄越楚境副將余
際昌率所部三千餘人分投抵禦因眾寡不敵賊卽於初七日竄
入蕪水該縣道路紛歧臣先調李續宜步隊舒保馬隊迎頭截剿
甫經拔營而賊蹤剽疾初八日已竄黃郡見距省城僅二百餘里
存城馬隊百數十名營兵亦止二千餘名不敷戰守已咨商駱秉
章暫將入川兵勇順流下駛馳援鄂省一面飛調荊州襄陽滿漢
官兵來省剿辦日內援師未到卽就存城馬步官兵一半畱守省
垣一半由臣親督扼駐省外要隘並帶水師礮船嚴防江岸迎頭
抵禦候調齊各路兵勇卽會同前敵上下夾攻上諭軍機大臣
等本日據官文奏皖逆由英霍竄擾黃州見籌堵剿所籌均尙周

密該大臣卽先就見有兵力分撥布置嚴密守禦並飛催李續宜舒保馬步官兵迎頭截剿毋稍延緩胡林翼見在太湖爲桐城諸軍後路援應此時賊由英霍竄至黃州省城兵力尙單防務喫緊自應先其所急著該撫迅卽派撥精兵協同堵剿以期痛殲醜類賂秉章見已啟程由水道入川計已行抵湖北著卽與官文會商如省城布置周密卽統率所部馳赴蘄黃一帶會合湖北各軍將此股逆匪併力剿洗迅掃逆氛俟該省軍情稍鬆再行帶兵赴蜀將此由六百里加緊各諭令知之○諭本日據官文奏粵逆勾結皖捻竄至黃州逼近省城見籌堵剿一摺逆首陳玉城勾結皖捻大股號稱十萬由霍山竄入蘄水賊蹤剽疾翻山越嶺間道而行分三路徑撲黃州去武昌省城僅百餘里見已諭令賂秉章管帶入川兵勇迅援武昌並諭令胡林翼派兵西上前後夾擊以期力

保省垣該逆飄忽異常儼被楚軍夾擊難保不折向北趨豫省光固一帶與楚北蘄水羅田等處毗連前因苗練滋事已諭令毛昶熙等嚴防光固見在粵捻大股竄至黃州情形尤爲緊要著毛昶熙嚴樹森速行籌撥兵勇聯絡鄉團扼守要隘嚴密布置毋令賊蹤闖入豫境將此由六百里各諭令知之○丁丑諭內閣田在田奏擒獲叛練並擊退攻城捻匪一摺宿州練總侯克順等密謀不軌欲借打糧爲名希圖攻取臨淮占踞宿城經田在田督率團練會同宿州知州廷瑞等將首逆侯克順江玉書就地格殺並將其黨與家屬一律擒獲近城各圩亦將苗營所派練董縛送分別正法其黨孫夢卜等句結大股捻匪攻撲宿州田在田復派撥兵勇過河由西關穿街出擊南北二路官軍復會合兜擊賊眾奪路狂奔我軍追殺二十餘里斃賊一百餘名奪獲槍礮旗幟二百餘件

賊勢益窮將孫夢卜江家彥等殺斃餘匪潰退侯克順等充當練總膽敢結捻攻城實屬孽由自作田在田設法擒獲擊退捻匪尙爲妥速所有守城出力人員著准其存記彙案擇尤保奏○諭軍機大臣等恭親王奕訢等奏接據崇厚函稱布魯西亞國幫辦班德赴津求見並有該國公使迂愛綸布遞奕訢照會一件內稱奉伊國特簡前來中國商定通商該王大臣等擬請特派大員赴津辦理於崇綸等三員內酌派一員幫辦並令哥士耆等赴津幫助等語布魯西亞國投遞照會欲通商換約據哥士耆聲稱與之換約可令其稽查漏稅於中國有裨威妥瑪則稱布魯西亞亦係大國不可不與換約該兩國既不能代爲阻止卽當與之換約以示一視同仁之意惟應統歸總理各國事務衙門辦理未便另派欽差前往致與米佛等國互有歧異奕訢等既未能分身赴津著派

崇綸會同崇厚辦理該國換約通商事務仍由奕訢等照會迂愛綸布令其在津與崇綸等商辦哥士耆既稱幫同阻止進京卽令其隨同崇綸前往曉諭迂酋阻其住京布魯西亞國之外尙有大大西洋國難免懇求換約將來亦可照此辦理其餘各小國若紛紛換約亦屬不成事體應如何豫爲拒絕並著奕訢等悉心籌畫妥爲辦理將此由五百里諭令知之○諭田在田奏宿州苗練乘機起事句結捻匪攻城先後擒獲逆黨並擊退捻匪一摺據稱苗營練總侯克順與宿州練董江玉書等密謀欲借打糧爲名攻取臨淮一面占踞宿城經田在田趕回宿州察知該處城鄉百姓均不願附賊打糧卽設法將侯克順江玉書等格殺並將該逆腹黨家屬擒獲近城各民圩聞風亦將苗營所派練董捆縛送城孫夢卜復句結捻匪撲城並令其黨內應均經兵練擊退斬殺等語練總

侯克順乘機謀叛民心不附立時被戮實屬孽由自取此時宿州業將滋事苗練概行殲斃蒙城紳民前亦將苗練等殺斃足見民情敦順苗練所部練勇屢在壽州尋仇焚劫並築圩撲城情形叵測前已諭令袁甲三將苗營黨與解散並設法殲除巨憝如果苗沛霖因蒙宿人心不附自知悔罪尙可暫事羈縻責令剿擒自效儻執迷不悟叛逆顯然該大臣卽遵前旨設計誘擒或令各縣縛獻不可再事遷就致貽後患將此由六百里諭令知之○戊寅諭軍機大臣等清盛奏擒逆被擊東竄見在帶兵出省剿辦一摺擒匪自攻撲泰安擊退後分股四竄由萊蕪竄至博山之顏神鎮復竄至章邱之黑峪口長山之周村等處地方清盛見帶兵勇前赴章邱一帶著卽探明賊蹤迎頭截剿其省城防務卽責令明新妥爲布置見在賊勢趨重東路僧格林沁派李麟遇德楞額管帶

兵勇分路赴東北追剿著該大臣等卽嚴飭該員等會合民團奮力擊賊並飭令恩襲扼守青州一帶毋使擾及完善地方前據僧格林沁等奏南捻復五旗並出邊馬已到馬牧集有向正北西北竄撲之勢此股捻匪見在情形若何西凌阿回駐濟甯曾否將該匪擊退清盛另片奏邱縣有白蓮教匪數百人劫犯劫庫並拆毀武營衙署經代理令王準捕拏格殺數人生擒頭目一名餘匪數名各等語鄒縣教匪尙未撲滅邱縣教匪復敢入城肆擾亟應及早殲除以免勾結著清盛嚴飭參將成志等實力搜捕並將莘縣館陶等處匪徒悉數拏獲盡法懲治毋任一名漏網將此由六百里各諭令知之○諭清盛奏邱縣地方有外來教匪數百人闌入城內衙署劫庫搶犯代理邱縣知縣王準等分帶兵勇格殺數人生擒頭目一名夥匪數名餘各逃逸訊據獲匪供稱兩股頭目一

係直隸清河縣楊家莊張姓一係館陶縣桃園朱姓其餘直隸曲周東省冠縣莘縣不知名姓俱係白蓮教匪見已分赴各處調人接應等語邱縣等處教匪勾結直隸清河等處匪徒黨與眾多見值皖捻竄擾東境勢甚鴟張該教匪等意圖乘隙滋事深恐勾結蔓延擾及直境著文煜嚴飭清河曲周等縣地方官將教匪張姓等嚴密搜捕務獲究辦毋令聞風遠颺致貽後患將此由五百里諭令知之○己卯李績宜奏逆首陳玉城糾合大股捻匪襲瞎子等直犯英霍查英霍萬山叢雜下通潛太上達羅麻蘄黃實爲皖鄂邊要有不得不同顧之勢胡林翼久病未痊未能督隊前進見在力疾堅守太湖副都統多隆阿仍駐桐城挂車河扼懷桐援應之路臣於二月初六日由青草壩率全軍而上視賊所向盡力追剿皖江南岸見有督臣曾國藩督師祁門建德進規徽池一路北

岸則安徽爲江表咽喉應力圖恢復以固根本六安壽州屏蔽全
淮亦應分防刻下楚軍勇力甚單非擊退援賊勢難兼顧前撫臣
翁同書所帶皖營可否請旨飭下漕臣袁甲三就近調度分守六
安壽州兩城俟安慶克復臣再行設法籌備上諭軍機大臣等
逆賊上犯楚疆勢極剽疾胡林翼力守太湖因病未能督隊李續
宜自應先其所急力保根本官文見調制襄滿漢官兵赴省又有
駱秉章一軍及李續宜等所帶馬步各隊兵力已厚前截後追此
股逆匪諒不難悉數殲除省垣稍有疏虞惟官文是問若不能繞
擊徒事尾追惟李續宜是問一俟鄂省軍情稍鬆李續宜卽督帶
所部馳赴壽州妥籌兼顧以便翁同書交卸啟程前諭官文胡林
翼調兵二千名駐紮三河尖此時兵力如可分撥仍著該大臣等
酌量撥往以壯皖北聲勢將此由六百里諭令知之○諭勝保奏

逆匪逼近直東邊界擬派官兵馳赴河間防堵一摺並請飭清河
道錫祉辦理保定深冀等處團練等語河間景州等處爲東路通
京大道見在捻匪竄擾東境直隸邊界亟應先事豫防勝保見由
大營撥青州陝甘兵一千名交總兵伊綿阿管帶馳赴河間所有
天津鎮標官兵一千名著文煜卽如數調赴河間駐紮統歸勝保
節制並飭令天津道孫治前往該府招集團練協同官兵實力扼
守其保定深冀等處毗連東境所有該處團練事務並飭文煜飭
令清河道錫祉親歷各屬迅速辦理遇有緩急卽知照勝保相機
策應本日已諭令烏蘭都帶領馬隊官兵一千名前來熱河駐紮
所有應支口糧馬乾等項仍著古北口糧臺支發其餘古北口駐
紮黑龍江官兵著文煜統帶認真操練以備調遣毋稍懈弛將此
由五百里諭令知之○諭李續宜奏皖逆陳玉城糾合大股捻匪

由霍山英山上犯鄂邊該撫已於二月初六日由青草塢率全軍進剿六安壽州一帶勢難兼顧請飭袁甲三就近調度分守各等語逆匪上犯楚疆擾及黃州李績宜督軍回顧本日雖諭令該撫俟楚省軍情稍定卽赴壽州第到任需時六安壽州一帶防剿不容稍疏袁甲三見在扼守臨淮務須妥籌兼顧不准稍涉顛預前諭翁同書俟李績宜到任後再行交卸此時苗練滋事壽州等處防剿喫緊該前撫自應仍遵前旨嚴密布置力保危城設有緊急卽會商袁甲三分兵協助不可專待李績宜到任致誤事機將此由六百里各諭令知之○諭前諭烏蘭都挑黑龍江馬隊一千名盛京馬隊五百名已由克興阿等統帶前往朝陽剿匪惟兵力尙少著烏蘭都將駐紮古北口西安官兵一千名配齊軍裝器械及鍋帳等件迅速管帶前赴熱河聽候調遣其餘黑龍江馬隊著交

文煜統帶認真操練將此由五百里諭令知之○庚辰諭內閣朕於正月間降旨於二月十三日回鑾繼因偶抱微疴改於二十五日啟蹕旬日以來氣體雖稍可支持仍須靜心調攝本日王大臣等以朕躬尚未大安奏請暫停回鑾情詞懇切不得已勉從所請暫緩回鑾俟秋間再降諭旨○翁同書奏苗練攻破堰口集後又破小圩數處脅從無數亦有堅守不降者與苗練互相殺傷臣派參將韓殿甲郭清標等帶勇集團分段堵禦苗沛霖近又破保義集大圩燒燬民房連營數十座前後得糧數萬石聲言有眾數十萬卽日將到等語袁甲三相隔二百里未能兼顧李續宜駐軍青草壩相隔更遠臣營兵勇因餉絀陸續遣撤止存一萬二千名除分防六安正陽潁州外僅四千餘名見在兩河口菱角觜等處苗營壘若貫珠柴米久絕正陽一綫餉道岌岌可危臣見在相地分

兵於雙橋集紮川勇一千名遏菱角背之衝以通正陽傳聞苗練將以大股攻撲壽州正陽而分股西窺光固臣已咨會嚴樹森毛昶熙嚴加防守以杜闖入豫境上諭軍機大臣等袁甲三扼守臨淮見在苗練攻擾壽州南鄉亟宜設法兼顧苗沛霖叛迹顯然疊次諭令袁甲三趕緊妥辦何以該大臣未將布置情形據實具奏著仍遵前旨查看該練可撫則撫儻始終怙惡卽迅速剿辦不可坐失事機李續宜到任需時翁同書已成坐困之勢壽州正陽如有失事惟袁甲三是問疊次諭旨翁同書均未接到著趕緊密交俾該前撫有所遵循壽州待餉孔亟該大臣卽迅速設法接濟以期力保危域將此由六百里諭令知之○諭春佑奏朝陽土匪分竄赤峯請飭帶兵官馳往剿辦一摺據稱卓索圖盟長色伯克多爾濟呈報逆匪占踞朝陽縣街分竄伯爾克四家子等處於十

六日夜闖入赤峯縣街焚燒衙署劫放獄囚復分股擾及該旗布固土哈拉烏蘇一帶地方見經札催昭烏達卓索圖兩盟長轉飭各旗派兵堵剿請飭帶兵副都統克興阿等督催大兵馳往剿辦等語土匪竄擾朝陽搶掠赤峯該二縣並不接界是否另股賊匪抑係由朝陽分股竄擾赤峯著克興阿蘊秀確切探明該匪大股見在何處卽會同昭烏達等盟官兵四面兜剿毋令竄逸不可因其分股牽掣以致兵分力單徒延時日將此由五百里諭令知之

○辛巳督辦河南團練大臣毛昶熙奏遵旨查明藩司賈臻膜視軍餉得旨當時北援事迫該藩司苟知顧全大局自應如數籌撥乃任意延玩殊屬可惡賈臻著交部議處○以王發桂爲左副都

御史

由通政使遷

○命翟誥來京以毛鴻賓署湖南巡撫未到任前以

布政使文格暫署○以倉景恬爲湖南按察使

由岳常澧道遷

○壬午諭

內閣前因山西等省欠解京餉銀兩當將山西巡撫英桂等降爲三品頂帶仍交部議處茲據戶部奏山西省將欠解京餉銀兩先後批解埽數全清尙知愧奮山西巡撫英桂布政使常績均著賞還二品頂帶其山東陝西河南四川欠解銀兩爲數甚鉅實屬玩誤著各該督撫趕緊解部清款如再拖延卽著該部據實嚴參○諭禮部奏朝鮮國王遣使臣瞻覲可否帶起行在等語朝鮮國王因朕駐蹕熱河遣陪臣奉表詣行在恭伸起居具見惻忱深堪嘉尙惟朕近日身體違和若該使臣遠來行在未獲展覲轉無以慰其瞻戀之誠該國使臣到京後著毋庸前赴行在禮部仍照例筵宴並賞給該國王玉如意一柄藍蟒段二匹粧段二匹大卷八絲段二匹小卷五絲段二件瓷器四件漆器四件賞給該使臣大段各一匹瓷器各二件漆器各二件大荷包各二對小荷包各三對

由禮部交該使臣祇領以示朕優禮藩封至意○癸未諭內閣辭
煥奏兵勇截剿竄賊獲勝一摺青浦嘉定等處賊匪於本年正月
間時出滋擾疊經我兵擊敗二月初一日該逆大股徑撲廣富林
營據經參將李恆嵩等督兵分路迎擊施放連環槍礮仍抵死抗
拒守備何慶福等開放大礮轟斃賊目一名及餘匪多人賊勢稍
卻都司王玉林首先陷陣各將弁一擁而進逆勢不支紛紛潰遁
我兵乘勢掩殺斃賊數百人奪獲旗幟槍械多件水路竄匪亦經
提督曾秉忠水師擊退另股竄撲塘橋鎮北營壘經李恆嵩等槍
礮並施斃賊無數餘匪旋在附近放火復經參將郭太平等分隊
剿辦擒獲騎馬賊目二名都司張應選等越濠砍倒賊目數名分
路兵勇奮力鈔殺賊眾奔竄其水路賊船經長龍師船擊斃多人
不敢闖入嘉定之賊同時亦由南翔竄至江橋華漕地方經各路

兵圍截擊各有斬擒剿辦尙屬出力在事員弁著薛煥擇尤保奏
候朕施恩○鑲黃旗滿洲副都統克興阿等奏朝陽賊匪分竄赤
峯見已派員馳探得旨赤峯距承德雖較朝陽略近然係分股自
易解散著偵探明確總期迅抵老巢焚其輜重殲其首逆餘匪自
然易剿若朝邑匪尙不退斷不可繞赴鳳凰致前後受敵又奏昭
烏達馬隊可否截留隨剿並哲里木馬隊見在並未到建無從催
調批昭烏達馬隊著准其截留隨剿著總理行營王大臣會同春
佑查明各處道路遠近分設腰撥以期奏報迅速○甲申杭州將
軍瑞昌等奏建昌總兵等缺請以吳再陞等簡放得旨軍營所出
之缺揀員請補專指副參以下而言提鎮從無奏請者所奏殊屬
非是○黑龍江將軍特普欽等奏請裁撤園丁歸耕以裕生計從
之○予浙江陣亡副將張應祿等祭葬世職○乙酉諭軍機大臣

等前據徐之銘奏克復晉甯州城一摺內稱將辦理招撫之回務副掌教徐元吉等殺斃當經諭令詳細情形查明具奏茲據張亮基奏回民掌教馬德新等懇請就撫張亮基商同先詣江右館親加曉諭徐之銘畏憚疑慮不敢前往密令四川從九品單功定煽惑刁紳李祖植等慫恿散練赴該前督署內懇求不准撫回並將署內什物搶毀殺斃通海縣知縣雷焱旋經兵練將舊撫之回民轟退又將浙江候補道馬椿齡逼令自盡謀殺招撫委員福建候補知府孫鈞壘次鈔其家貲又稱該撫將紳民婦女畱住署中有歸家白晝者屬吏家眷常相往來請託賄賂劣蹟甚多欲令副將麟志之妻進署認爲乾女麟志不肯懷恨將其撤任又因富呢雅杭阿私行餽賂遂互相撤換各等語雲南漢回互鬪辦理之法全在分別良莠不分漢回勦撫兼用不可稍存私見張亮基奏稱亟

宜乘機招撫係爲大局起見徐之銘任性妄殺阻回民向善之機必致激生他變況貪財漁色種種妄爲實屬大負委任劉源灝接奉此旨著卽迅速馳赴新任將徐之銘撤任聽候查辦務將被參各款逐一確查據實參奏不准稍涉回護並查明調任陝西巡撫鄧爾恆在滇辦理回民事件如能持平卽奏請署理雲南巡撫儻民情未能悅服亦卽據實具奏毋得徇隱將此由六百里加緊各諭令知之○丙戌諭內閣前因王有齡奏請派大員總司捐務當降旨令王履謙督辦嗣據王履謙奏浙東團練事無專責復降旨令其幫同王有齡辦理浙江團練並督辦勸捐事宜茲據王履謙奏王有齡將該前副都御史督辦之名改爲總辦紹郡勸捐事宜並將奏明設立之局擅自裁撤歸地方衙門辦理並未奏明實屬非是王有齡著交部議處○袁甲三奏苗練渡淮立營直向壽州

以南滋擾占踞民圩廬鳳道才字和臬司張學醇均在正陽屢次
函諭苗沛霖速將練眾撤回而至今未退該司道等若遽赴壽州
辦案必致壽人藉口無以折服其心設另起波瀾愈難收拾蒙城
自搜殺苗黨後慮其報復人心惶惶臣因蒙宿本屬毗連咨商田
在田等就近派兵鎮撫聯絡尙未接其抽撥之信而宿州官紳又
以苗練恃強跋扈殺其城內辦事親信數十人苗練因此愈有藉
口懷遠苗練亦與官民互相猜忌誠恐再滋事端更難著手臣已
派委延綏鎮總兵博崇武星夜前往剴切開導務使民練相安官
紳一體旋又探聞苗沛霖之姪苗添馨及練總王玉科等糾約濬
南團練不知意欲何往田在田馳回徐郡後宿城謠言四起民心
大爲驚疑並接泗州靈璧稟探苗練大隊又到該境擄糧臣先派
遊擊張景春等帶領兵勇五百由泗州迎頭遏剿復加派副將向

聰得等酌帶小隊馳赴固鎮會同參將朱玉成等所帶兵練相機
妥籌以爲要截之計臣見已暗中節節布置極力防範並密商翁
同書察看各路軍情緩急隨時斟酌妥辦儻該練有一綫可原尙
可寬其既往若竟肆意橫行或有句通粵逆情事卽當調齊團練
謀力兼施以期早殄巨寇又奏苗沛霖性本難馴臣所以牢籠駕
馭委曲求全者原欲借其力以剿賊期於軍事有濟前派張學醇
等往辦壽城之案以其素尙相得仍欲示以坦易滿擬將其渡淮
滋擾之事作速禁止仍可就我範圍適蒙城宿州相繼逐殺其辦
事之人因而猜忌更深其勢洶洶查蒙宿之民去逆效順本屬可
嘉惟事關大局必須能發能收確有把握乃可鋤兇弭亂若徒快
一時之忿而人心不齊作事不終適足益其暴戾之氣而堅其反
側之心非全局之幸也苗沛霖本係勝保所招撫苗沛霖上年冬

月專人進京遞稟求勝保爲之申雪其相信之深更可概見此時若令勝保來皖必能操縱得宜力挽大局惟勝保能否前來臣實未敢懸揣頃據江南提督李世忠稟稱約於本月二十後可到臨淮並苗沛霖兩次給該提督原信大意句其共圖壽州並據淮河之險該提督未遑責以背叛婉言開導以冀悔悟如何辦法俟該提督到後再行妥爲籌商又奏疊奉諭旨飭臣查看苗練情形可撫則撫否則密速定計早剪巨憝查苗沛霖桀驁不馴固屬罪不容誅而較之粵捻之顯然叛逆尙屬稍知顧忌此時積年巨寇尙須反覆開導勸令投誠豈於該練偶入迷途不思委曲以消隱患此臣所謂但有一綫可原仍欲牢籠駕馭也卽以苗沛霖徐立壯孫家泰三人衡而論之孫家泰剛愎任性暴戾恣睢擅殺無罪已非地方官所能鉗制若令有眾數萬其悖逆有不可知者矣徐

立壯無馭眾之才而事事較苗沛霖變本加厲卽如苗之截臣餉船不過因撫臣未爲辦案欲藉以激成臣怒爲之伸冤其於李世忠及往來商船尙不擾害也徐立壯見於魯家口無論官商肆行截搶致商販阻隔鹽米之路頓絕李世忠亦憤激具稟請爲勦辦其釀亂尤爲可恨論見在局勢不能寬孫徐而獨責苗練將來辦法亦必須參以權術臣平情度勢此三人中不除一人萬不能敷衍了事已密飭張學醇等相機除徐或徑約苗沛霖合力攻之既可藉撤圍壽之兵亦免致李世忠積憤不平若於合兵之際收漁人之利亦一舉兩得之事並密遣人赴壽屬翁同書設法除孫以釋苗怨而爲解圍之計蓋苗練聲稱如不攻城不能報仇似非志在破城或因孫在城中虛聲恐嚇欲得而甘心也臣已密告翁同書若不量思變通壽民被圍情急萬一私將孫家泰捆送苗練又

豈翁同書所能禁止

臣

於此事經權並施實已不遺餘力至張學

醇之能副

臣

望翁同書之能聽

臣

言與否則不能逆覩也翁同書

奏二月十三日夜下蔡苗練數百人繞出入公山後突至東津渡

意欲掠船偷渡經參將吳峻基督勇開礮轟擊該逆旋即撤回十

四日探聞南路苗練攻石家集未拔遂由廬郡北境撤回並新收

之眾號稱數萬連營數十座自三覺寺保義集堰口集向原路而

歸聲言約會廬逆用地道圍攻壽州並探得苗沛霖爲南路練總

王舟截擊幾不得脫乘夜撤退

臣

於十五日派黃鳴鐸帶領礮船

赴菱角觜防堵

臣

親督總兵慶瑞等帶領馬步隊二千餘名赴雙

橋集一帶彈壓冀其撤回下蔡仍防闌入近郊詎意十六日夜間

該練分股攻撲九里溝雙橋集兩營經我軍乘月出營迎擊始行

敗奔查壽州與臨淮片帆直達自下蔡被踞咽喉已塞僅有一綫

間道可通文報其南通六安西通正陽之路亦幾斷絕桐懷各縣
爲一片寇氛所隔新任撫臣李績宜從未得其信息風聞狗逆大
股十餘萬自麻城折回仍踞流波礮六安頓形喫緊難保非因句
串而來臣扶病登陴已及一月孤城援絕惟有勉力嚴防未敢鬆
懈其正陽防守事宜已屬總兵扎隆武加意防範俾免疏虞上
諭軍機大臣等苗沛霖因蒙宿逐殺其辦事之人猜忌更深該練
屢次攻撲九里溝雙橋集等處營盤並有約會廬逆用地道圍攻
壽州之語實屬罪大惡極難再姑容袁甲三辦理此事毫無把握
若再因循遷就必致養癰貽患苗沛霖兩次寄信李世忠約其共
圖壽州同據淮河該提督不遽責以背叛仍婉言開導冀其悔悟
其公忠爲國之心實堪嘉尚惟苗沛霖以鄉曲之人經朕擢至道
員不知感恩圖報輒敢謀爲不軌實屬孽由自作著卽傳諭該提

督乘此機會以密函招致設計殲除較之威以兵力尤爲便捷其餘黨與仍可曉諭解散以安反側此事宜密速辦理不可洩漏致誤事機翁同書坐困孤城兵單餉絕袁甲三仍當遵奉前旨妥籌兼顧不可稍有疏虞此次翁同書摺片著發交袁甲三俟收到時卽專弁妥遞翁同書軍營以免遺失又據出在田奏徐宿軍餉欠缺請借撥塲鹽濟急等語准鹽銷路不暢西壩存鹽甚多該總兵請嗣後按月捆運鹽三四千引暫借徐州引地銷售係爲軍餉起見並著袁甲三通融借撥以濟急需俟徐營軍餉充足卽如數歸還皖營可也將此由六百里加緊密諭袁甲三並傳諭李世忠知之○諭王履謙奏賊窺浙東江防單弱情形危急一摺新城臨安等處賊匪伐竹作簞撈搶船隻意圖窺伺甯紹昨據王有齡奏富陽克復後賊蹤分布新城分水一帶時思竄撲浙東雖經該撫撥

派師船嚴防江面惟賊勢蔓延有增無減而沿江二百餘里兵力無多設有疏虞大局將不可問王有齡統轄全省責無旁貸著嚴飭帶兵各員弁實力堵剿並隨時派撥兵勇前往協剿毋令賊蹤竄入完善地方王履謙幫辦團練亦有防剿之責著卽激勵民團會同官軍力固江防並督辦勸捐事宜不可稍涉推諉將此由六百里各諭令知之○諭譚廷襄奏馳赴新任力籌防剿請派大員赴直東交界駐紮並請借撥陝西餉項一摺捻匪東竄長山鄒平一帶本日據清盛奏帶兵出省勦辦力保東省門戶並遏其北竄之語當不至深入爲患見在僧格林沁駐軍汶上力退兇鋒直東交界處所最關緊要前經勝保奏令總兵伊綿阿帶領西安等處官兵一千名並令文煜於天津鎮標官兵內調撥一千名駐紮河間又命天津道孫治赴河間整飭團練相機堵剿直東交界地方

已有布置所請將管調河州等處官兵分撥東省防剿之處著毋庸議該撫抵省後卽將省城防剿事宜妥爲籌辦並飭帶兵各員會合民團實力兜剿迅殄賊氛毋任分竄將此由五百里諭令知之○諭田在田奏擊敗宿南土匪遵旨回徐商辦防剿一摺滄南練總王玉科據寨糾匪意圖抗拒經該總兵派兵兩次痛剿潰散逃去此時宿州情形稍輕而徐州一帶則自伊興額等追賊陣亡後民心震動該總兵馳赴徐郡與吳棠力籌攻剿務須設法牽制擒匪後路俾竄擾東省逆匪有所顧忌仍聯絡鄉團嚴密堵禦以防逆匪回竄毋稍疏虞其宿州一帶卽著責成胡元昌駐紮該處統率兵練固結民心嚴防苗練報復將此由六百里諭令知之○予江蘇殉難知縣李謙等安徽被害知府姜錫恩祭葬世職山東陣亡副都統伊興額總兵官滕家勝建祠○戊子諭內閣王夢齡

奏隄工合龍一摺江蘇江運小六堡隄工經署漕運總督王夢齡督率在壩文武紳董籌款備料實力修築旋即合龍辦理尙爲妥速署江運同知丁承鈞江防營守備趙秉節原參摘頂之案均著准其開復其餘出力文武官紳著王夢齡擇尤保奏候朕施恩毋許冒濫○諭軍機大臣等勝保奏請帶兵千名赴朝陽赤峯一帶剿辦土匪先在古北口屯紮並馳赴熱河等語朝陽縣匪徒滋事見已陸續調派熱河哲里木及駐防古北口之黑龍江西安並盛京等處官兵三千數百名並據玉明派兵千餘赴朝陽會剿計已足敷剿辦勝保著卽赴行在所請帶兵一千名赴古北口駐紮之處著毋庸議將此由五百里諭令知之○諭前調古北口駐紮之西安官兵一千名著歸成明統帶馳赴朝陽剿匪烏蘭都著暫在熱河聽候諭旨○是月貸黑龍江歉收地方旗丁籽種口糧